

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

PAPEETE, i te 4 no Novema 1991.

RECULE
29 AVR. 2002

E hōa here e,

Ia ora na i te aroha o te Atua.

Terā mai ta tatou Veà Orometua ei tautururaa ia tatou i roto i te mau oroà hōpea matahiti e te matahiti apī e fatata mai nei ia tatou, ia au i te mau faataaraa i muri nei :

- | | | |
|---------------------------------|---|---------------------|
| - Tapati 1 no Titema 1991 | : | Tiairaa 1 |
| - Tapati 8 no Titema 1991 | : | Tiairaa 2 |
| - Tapati 15 no Titema 1991 | : | Tiairaa 3 |
| - Tapati 22 no Titema 1991 | : | Tiairaa 4 |
| - Mahana toru 25 no titema 1991 | : | Noera |
| - Mahana piti 31 no titema 1991 | : | Pureraa pō matahiti |
| - Mahana toru 1 no tenuare 1991 | : | Matahiti Apī. |

(I te pō mahana piti 24 no titema, mai tei matarohia iho ā e tatou i te mau matahiti atoà, e pureraa pō Noera iho ā to tatou).

No ta tatou pureraa hepetoma no te matahiti 1992, e haamata ia te reira i te tapati 5 no Tenuare (pureraa avatea) e e opani i te tapati 12 no tenuare (pureraa avatea). E faatiahia te Oroà a te Fatu i taua na tapati ra.

Eiaha atoà e haamoē i te faatupu i ta tatou pūpūraa ô i taua hepetoma ra no te tautururaa i te mau ohipa a te Etaretia (mai te tatairaa i ta tatou mau fare haapiiraa porotetani ...).

No reira, a rave maite i ta tatou mau tapura ohipa ei hanahana no te Fatu o ta tatou e tavini nei, e mauruuru â i te mau taeaè atoà i faaineine mai i te mau faaitoitoraa, te mau poroiraa e te mau mea atoà e vai ra i roto i teie Veà-Orometua ei tautururaa iho â ia tatou i roto i teie mau oroà rarahi e fatata mai nei ia tatou.

Aroha atu i ta oe Apooraa Tiàtono e i te paroita.

Aroha atoà atu i to te utuafare.

Ia maitai e ia oaoa outou i teie Oroà Noera e te Matahiti Api 1992 e fatata mai nei i te here faito-ore o to tatou Fatu e i te ioà atoà no te Apooraa Faatere o ta tatou Etaretia.


Papaihia : Jacques IHORAI orometua

TAPATI NO TE TIAIRAA MATAMUA (1 NO TITEMA 1991)

TAIORAA PIPIRIA : IEREMIA 33/10 E TAE ATU 16

FAAITOITORAA : IEREMIA 33/15.

E faatupu vau i te hoê ohi no te opu o Davida, e Aito no te parau tià, e faatere oia i te fenua ma te "afaro e te parau mau".
(version synodale).

E hoa here ma e; ua ô faahou tatou i roto i te tau no te tiairaa o te tapati matamua hoi teie e haamata i te faaara i te mau parau no te Mesia : Te tiairaa i te Fatu, te na mua o te Fatu, Maria te metua vahine o te Fatu, te tau o Noelz oia mau !

Ieremia peropheta, te manu na te Atua. Te himene nei te manu i te tau poai ei faaite e, te fatata maira te tau ûa. Te himene nei te manu i te tau vero ei faaite e, te fatata maira te mahana maitai.

Te tohu nei te peropheta i te tau auhune e te tau oê, ei faaite ia Iseraela te nunaa maitihia e te Atua e to na mau aratai, e ei faaite atoà i te mau nunaa èè : e parau ta te Atua e hinaaro i te parau mai : parau no te maitai, aore ra no te ino. Mai ta na i parau ia Mose no Iseraela : E tuu vau i te maitai e te ino i mua ia oe, a rave i te maitai ia ora oe.

A faaroo na tatou i te vetahi mau tohu i ta Ieremia :

a) Ua tohu oia i te taima e faahaehaa hiai te arii no Iuda o Zedekia no to'na ino. (Ieremia 32/4) : E ore hoi te arii no Iuda o Zedekia e ora i te rima o te Kaladaio, e tuu mau oia i te rima o Babulonia.

e) Ua tohu atoà oia i te paura no Ierusalema no to na taiva i te Atua. (Ieremia 32/26) : E horoà vau i teie nei oire i

te rima o te Kaladaio e te rima o te arii o Babulonia o Nebukanesa, e pau teie nei oire ia na.

f) Ua tohu atoà oia i te hoê tau apî, te tau faaoraraa i te mau tîfî ati-Iuda. (Jeremia 33/11) : E faahoi mai hoi au i te tîfî o teie nei fenua mai tei mutaa ihora, te parau maira Iehova.

h) Te tohu nei oia i te hoê mahana e fatata maira, e faatupu ai te Atua i te maitai i te ùtuafare o Iseraela e o Iuda, na roto i te hoê ôhi no te opu o Davida. (Jeremia 33/15). O ta tatou ia parau no teie tiairaa matamua :

"E faatupu vau i te hoê ôhi no te opu o Davida, e Aito no te parau-tià ; e faatere oia i te fenua ma te "Afarò e te parau mau."

E toru parau rarahi ta tatou e hio :

1) Te ôhi no te opu o Davida.

Ua tohu na Isaia i te parau no taua ôhi ra. (Isaia 11.1/3)... O te hoê ôhi tei tau i te huru no te tumu mai te mea e, ua riro na te ôhi matamua o Davida ei arii o tei faatahoê i te nunaa Iseraela i to na ra tau.

Te riro nei teie ôhi apî ta Jeremia e tohu nei, ei faatahoê i to te ao nei i roto i ta na ohipa faaora. No reira te fanauraa mai no teie ôhi, eere ia i te hoê ohipa tupu ohie noa ; Ua tupu ra te reira na roto i te fifi e rave rahi ; aita e vahi vairaa i roto i te fare tipaeraa; ua taparahi hia te mau tamaroa no Betelehema etv.. Aita ra teie ôhi i mutu noaè i te tapû.

I te 12 o to na matahiti, i itea hiai te haamataraa te hotu no taua ôhi ra i rotopu i te feia i Ierusalem ; aita ra hoi ratou i vahavaha noa'tu i to na huru i taua mahana ra. Ua maere ra ratou e te feia atoà i faaroo ia na, to na ite e ta na parau.

2) Te Aito no te parau-tià

I roto i te mau tatauraa no te mau aito no teie nei ao, i te pae no te horo anei, aore ra no te moto, mai ta Paulo i faahiti i to 1Korinetia 9/24 : Te feia e horo i te hororaa e horo paatoà, hoê ra e rave i te berabeio. Te aito e roaa ia na te tiàraa numera hoê, e horoà hia te fetia piru no na.

Ta Ieremia e tohu nei ; o te hoê ia aito taaê roa i te mau aito atoà, e aito no te parau-tià. Aita e aito i roto i teie nei ao te tià ia haru mai i te tiàraa no te parau-tià, tei ia Iesu-Mesia anaè te reira : Oia te e'a, e oia te parau mau. (Ioane 7/46) : Ua parau maira taua feia toroà ra, aita roa e taata e au ai te parau i ta tera aèra taata.

Aità Iseraela i ite e o Iesu Mesia taua aito no te parau-tià ra, o te hoê ra etene i pihaiho i te satauro tei horoàhia te ite ia na.

Luka 23/46-47 : ua pii hua'tura to Iesu reo i nià i te satauro. E ta ù Metua te tuu atu nei au i ta ù Varua i to rima na, e oti aèra taua parau ra, pohe ihora. E ite aèra te raatira 100 i taua mea ra, haamaitai atura i te Atua na ô atura : E taata parau-tià mau â teie.

3) E faatere oia i te fenua ma te "afaro e te parau mau."

Ua oti ta Iseraela tiairaa i te Mesia. Ua tano te maa parau ra e : I haere mai nei oia i ô na ihora, aita râ to na taata i ite atu ia na.

O tatou Iseraela apî e tiai nei i to na haereà mai. E mea papu te reira o te piti ia o to na tere i te ao nei. No te faatupu i te maitai i te ùtuafare o Iseraela e o Iuda, ia au i te irava 14.

Ua horoà hia te ite i taua ôhi ra ia Ioane na roto i te orama no Patamo, e ôhi haapao e te parau mau e te tamai hoi i te tamai ma te parau-tià. To na ioa : Te arii no te mau arii, e te Fatu no te mau fatu.

Te raveà tei horoàhia i te taata teretetano no te tiairaa :

Mataio 24/42 : E teie nei, e ara aore hoi outou i ite i te hora e tae mai ai to outou Fatu.

Luka 12/37 : E ao to te reira mau tavini, i te roohiaraa mai e to ratou Fatu te ara ra.

HUNTER Orometua

TAPATI NO TE TIAI RAA II

(tapati 8 no titema 1991)

Taioraa : Marati 3/1-4
 Firipi 1/4-11
 Ev. Ruta 3/1-6

Faaitoito raa : Marati 3/1 v. m. ; Ruta 3/5 ; Firipi 1/4.

Inaha, e tono vau i tau veà, e na na e haamaitai i te eà i mua ia'u ra. Marati 3/11 v. m.

Ia hope te peho i te faaihia, ia hope te mouà, e te mau aivi i te haapapuhia, ia faatitiaifaro hia te eà pio, e ia haamanina hia te eà puupuu. Ev. Ruta 3/5.

Te haamaitai nei au i tau Atua ia mehara'tu vau ia outou aita e faaea. Firipi 1/4.

E hoa here ma, i roto i teie Tiairaa piti no tatou, Iaorana amui tatou i te Aroha o te Atua.

A faarii mai i te tapaò no te Aroha o te Etaretia Evaneria ia tatou paatoà i roto i teie taime Tiairaa, faaineineraa i te taeraa no to tatou Fatu.

(Aroha raa ...)

I teie tapati mai ta tatou i faaroo iho nei i te taioraa hia ; e toru ia ta tatou taioraa iau iho i ta tatou tarena taioraa pipiria.

No reira, ua rave mai au i na irava tootoru i roto i na taioraa atoà, ei raveà no te aratairaa i te manaò.

Mai te mea ua rave mai au i na taioraa tootoru atoà no te mea ihoà te vai nei te tahi tu'atiraa i roto ia ratou.

Ia hiò mai tatou i roto i te faufaa tahito, i roto i te puta a te perofeta o Marati te vai nei te tahi faaauraa a te perofeta ! "Inaha e tono vau i tau veà e nana e haamaitai i te eà i mua ia'u ra. (M. 1/4 v.m." i roto raa ra i te faufaa tahito, ua tohu hia teie parau.

Teie parau, e parau rahi teie, e fafau raa apî teie ta te Atua e faaineine nei na roto i te tono raa mai te veà. Iau te mau puta tuatapaparaa, ua tupu teie parau i te 5 no te tenetere hou Ietu i muri ae i to te nunaa Iteraera hoiraa mai mai te tîfiraa i Papuronia. Te anoi rii roa ra te mau haamoriraa i roto i te nunaa Iteraera. E te imi nei te perofeta ra, tei parau hia o Marati no te mea e, eere teie to'na ioà e auraa parau noa teie. Teie to'na auraa "Te vea tono a te Atua". Na roto i teie taata, te hinaaro nei te Atua e faatitiaifaro faahou i te faaroo o te nunaa Iteraera. Na roto i teie taata, te hinaaro nei te Atua, e faaite â i to'na here i to te Ao.

Na roto i teie taata, pae hanere matahiti hou te taeraa mai te Fatu, te faaite maira te Atua e, ua tae i te taime no te faahoì faahou raa ia tatou i te Atua ra.

E tono vau i tau vea e na'na e haamaitai i te eà i mua ia'u ra. E te Fatu ta outou e imi na, o te tae vave mai ia. P. 3/1 v.r.

Teie râ, i roto i ta tatou taioraa te titau atoà maira te Atua ia tatou i te irava 2.

E tia ra ia vai te faaoromai ia tae i te mahana e haere mai ai oia ra.

Te uiraa e tano i teie vahi teie ia. Nahea teie veà i te haamaitai i te eà o te Fatu ?

Te pahonora te na ô ra ia i te piti no ta tatou irava ; i roto i te Evaneria no Ietu iau i te hioraa a Ruta 3/5 : "Ia hope te peho i te faaihia, ia hope te mouà, e te mau aivi i te haapapuhia, ia faatitiaifaro hia te eà piò, e ia haamaninahia te eà puupuu".

No roto teie parau, i te piti no ta tatou taioraa, oia hoi, teie veà i fafauhia mai i roto i te faufaa tahito e te puta a Marati o Ioane ia te tamaiti a Tataria ta te irava 2 e haapapû maira. "I tae mai ai te parau a te Atua ia Ioane a Zataria i te metepera ra."

Te ui faahou nei tatou : "Te raveà ta Ioane e rave no te faatitiaifaro i te mau mouà ?"

Te pahonora e tano ia horoà hia o te irava toru ia no te taioraa. "Haere atura oia na te mau vahi atoà i te pae i Ioritana ra, i te poro haere raa i te papetito tatarahapa ia faaore hia te hara".

Teie te ohipa e titau hia nei i te taata, ia tatarahapa oia, ia faarii tatou e, e feia hara anaè tatou. I reira ia te Fatu e haere mai ai.

Te parau ra i roto i te Marati : "I tia ra ia vai te faaoromai ia tae i te mahana e haere mai ai oia ra".

I teie tapati no te Tiiraa, ua ineine anei tatou ?

I teie tapati tei roto anei tatou i te farii raa ?

Te mau uuiraa teie, e tano ia tatou ia ui i roto ia tatou iho ...

Mai te mea, tei reira tatou i te vairaa.

E tanohia ia te parau ta Pauro i parau atu i to Firipi oia hoi, te toru no ta tatou taioraa, e ta tatou irava ... pene 1/3.

Te haamaitai nei au i tau Atua ia mehara'tu vau ia outou aita e faaea.

No te aha teie haamaitairaa a Pauro i teie etaretia no Firipi ?

Te pahono ra i te irava 5 : "I to outou amui-atoà raa mai i te Evaneria nei mai te matamua mai a, e tae roa aènei i teie nei".

No tera huru to ratou, i haamaitai o Pauro ia ratou. No to ratou faaroo, i haamaitai o Pauro ia ratou. No te mea ua ineine teie etaretia i te faarii i te Fatu.

E hoa here ma e, tera te titauroa i mua ia tatou. Tei hea tatou i te vairaa ? Te pahonora tei roto ia tatou, tatai tahi.

Te na ô maira ta tatou pue irava :

"E tonu vau i tau vea e, nana e haamaitai i te ea i mua iaù ra, e te Fatu ta outou i imi na, o te tae vave mai ia.

I hope te peho i te faaihia, ia hope te mouà, e te mau aivi i te haapapuhia, a faatitiaifaro hia te eà piò, e ia haamaninahia te eà puupuù.

Te haamaitai nei au i tau Atua ia mehara'tu vau ia outou aita e faaea".

Iaorana.

Hitiura orometua.

(faanavai atu)

TAPATI NO TE TORU O TE TIAIRAA

(tapati 15 no titema 1991)

Taioraa : Ev. Ruta 3/10-18.

I te mau hiti no te pape no Ioritana, tera pape tei tahe mai Repanona mai e faarue tia atu i roto i te Miti pohe, tera pape e faataaê e tei tahoê i te fenua o te pipiria e tera mau taata i ô mai : Teie mai nei te tahi taata, to na í'oa o Ioane Papetito. (Te Atua tei aroha mai). Tei te hiti no te otià no te fenua tei parauhia i tahito ra. "Te fenua tahe pape noa te û e te meri. Te titau nei Ioane i te mau taata atoà.

E rave rahi mau taata tei pahono mai i taua titauroa ra, no Ierutarema e no te tahi mau vahi ê atu mai. Te mau huru taata atoà tei tae mai : te mau terona, te mau faehau, te nunaa ete vai atura". E taua mau taata ra ua î i te oaoa i tera ohipa e tupu ra, no te mea tei roto te nunaa i te tiairaa, tiairaa i te hoê faaora.

E mau mea rii haihài roa ta na maa, areà ra ta na parau, mai te auahi ûra ia te huru. Ua uiui te taata, e perofeta mau paha teie taata, e taata paha te faaite mai ia tatou i te mau parau o te tupu mai ananahi. E taata paha teie e hopoi mai te hau e te parautia. No reira i te hiti no Ioritana e rave rahi mau taata e parahi ra i roto i te oaoa. E mau taata tei farii i te hoê faaapîraa na roto i te papetitoraa i roto ia Ioritana. Ioritana, te pape no te faaapîraa.

Te vaira anei te pape no te faaapîraa i teie mahana, te hoê pape no te faaapî i te aau o te taata, no te rahu faahou i te taata ? Te vaira anei te Ioane Papetito apî i roto ia tatou ? Tera Ioane, ta na parau mai te auahi ra te huru ? Teie mau uiraa e mea tià ia tatou ia hiò faahou i to tatou huru, te parau no to tatou papetitoraa.

Te taata o te Atua, te farerei nei tatou i te mau mahana atoà, tera taata e toro atura te rima no te faatià mai i tera taaê i topa, i tera i poia, i tera e fifi ra, i tera e poiha ra. I tera e tauturu i te feia apî i roto i te mau fifi no teie mahana. E mau raveà rii roa tei anihia ia tatou, e mea rave-atâ-ra i te farii. No reira tera ohipa i tupu i te hiti no te pape no Ioritana, ia riro o ia ei tumu parau na tatou i roto i teie tau no te tiairaa.

Te parauhià nei to tatou faaroo i teie mahana ; i to'u manaò, manaò no te taata hoê, ua oti te tau no te tiairaa, e tau faaohiparaa teie nei, ua tae mai te Faaora, ua tae mai Ietu, te mea tià ia tatou ia rave, o te faaohiparaa ia i te mea o ta na i faauê mai. Ia hiò anaè tatou i ta tatou parau, eaha te mea e anihia ra ia tatou, o te opere raa ia, mai te mea ua rahi ta oe (Ir. 10.11).

I teie mau mahana ta tatou e haere atu nei, e mau mahana oroà ia, (tamaaraa), ua haamanaò anei outou i te feia e aita ta ratou.

E mau taata papetitohia tatou, teie te auraa e mau taata ia tei faaapihia, teie te auraa aita e patu e faataaê-faahou ia tatou te tahi i te tahi. E mau taata tatou no te hau, no te parautià, a faaitoito i te ora i to tatou faaroo, e ia nehenehe ia tatou ia horoà i te taata e aita ta na, noa'tu e mea iti haihai roa, te faatupu ra ia tatou i te Patireia o te Atua. Te reira ta Ioane Papetito e titau nei ia tatou i teie tapati, te toru no te tapati o te tiairaa. Iaorana.

Lucien TARIHAA Orometua

TAPATI NO TE TIAI RAA MAHA

(tapati 22 no titema 1991)

Te mau taioraa : - Mita 5/1-5
 - Hepera 10/5-10
 - Ev. Ruta 1/39-45
 - Taramo 106/1-5

Irava faaitoitoraa : - Ev. Ruta 1/39 :

“Ua tià a’era Maria i reira, haere oioi atura ...”

Aroha raà :

Manaò Omuaraa :

E hoa here ma e, i teie nei â tapati tiai raà ta tatou e ora nei, aita ia te Atua i hinaàro noa i te mataitài noa mai ia tatou, ua rahi râ to’na here e to’na manaònaò, i parahi taàmu noa mai ai te Atua ia tatou nei. Eaha te ohipa e tupu ra i ô te mau perofeta ? Teie, ia au i to’na Tiàraà e to’na Moà raà, eita roa ia e nehenehe i te Atua, ia amui roa mai iho i roto i te ora raà o te taàta nei. No reira o Mita perofeta i parau ai e : “eere ta te Atua opua raà i te mea faà haruru ..., e tupu iti noa râ te reira i roto i te hoê oire iti haìhai roa, oia hoi te oire ra o Peterehema. E Mana oia, e e Faàtere oia, eiaha râ mai ta te mau hui arii ra, e mea na roto râ i te Puai o te Fatu.

E te reira Puai, e riro ia ei mea faufaà no te ora raà o te nunaà, no te mea, na te reira e paruru e e tapeà i te ora raà hau i roto ia’na. No teie manò, e piti ia tau reta parau matau maitai hia e tatou, te tià e tapeà mai ei hio raà : oia hoi, ta to teie nei ao e paimi rahi nei na roto i ta’na mau raveà haàviraà ; e te tahi, ta tatou ia e ite atu ra na roto i ta te Atua, o te here ia e te aroha raà, te faàoromai e te taviniraa, te tauturu e te opereraà, e na roto i te oraraà tauturu.

Eaha to tatou manò i te reira ? Aita ânei teie hi’oraa hopeà e riro ra ei raveà atoà na tatou no ta tatou faà hanahana raà ia Noera, e no te heheu faahou raà mai i te parau mau no te reira ?

1.- Ta tatou irava parau no teie mahana, tē na ô mai ra ia :

“Ua tià a’era Maria i reira, haere oioi atura ...”

No te aha teie haere oioiraà no Maria ... ? Teie no te mea, ua poroi hia mai oia, e ua horoà hia mai te hoê tapaò ia'na, haere oioi atu ra oia ..., no te mea, i roto i te ora raà, e ere ia te hoê tapaò i te hoê ohipa papu mau. E mai te mea, ua haere oioi roa'tu oia no te farerei tino roa'tu ia Eritapeta, ia au i ta te merahi i parau mai ra, e hinaàro mau ia te reira no Maria, i te ite papû e, e teie aiu ta'na e farii nei, o te Metia mau ia. No reira ia hi'o tatou, ua riro ia te parau no te tapaò no Maria, ei faaitoitoraà, eiaha râ ei haà paruparu raà. E ahiri i roto i to tatou atoà nei ora raà, te haà paruparu nei tatou i mua i te tapaò e horoà hia mai nei e te Atua ia tatou, te faaite ra ia te reira i te tapaò no to tatou paruparu i mua i te Atua. No reira i ô nei, no Maria, taaê noa'tu ai to'na huru haehaa, ua tià oia i reira ra, i ta te Atua faaueraa, ma te uiui ore, no te haere i te utuafare o Tataria.

2.- Te farerei raa a Maria raua o Eritapeta.

Eaha te faufaa raa no teie farerei raa ?

Teie, te parau noa ta tatou e nehenehe e tapaò mai i roto i teie farerei raà no Maria ia Eritapeta, e farerei raà faufaa roa ia, no te mea, e ere noa teie i te farerei raa Maria e o Eritapeta, e farerei raà râ no Ietu e o Ioane, oia hoi e farerei raa no te Arii e to'na Orero, oia hoi e farerei raa i rotopû i te Faàotiraà e te Poroiraà. Oia mau, i roto i teie taime, o te poroiraà ia teie e aroha ra i te faaotiraa, ia au i te ohipa i tupu i roto i te opu o Eritapeta, na roto i te ouà raà te tamarii, e te reira ra, i te taime ia i pahono ai o Eritapeta ia Maria. E te na ô ra o Eritapeta e : "No te aha ra hoi au i itea hia mai ai ...? Te ite nei tatou i te huru o Eritapeta, e to'na farii raà i te reira mai te maramarama mau i te ohipa i tupu iho nei. No reira to'na umereraa e to'na maere, i te mea oia i riro ei ite papû no te faà nahoraà ohipa a te Atua na roto ia'na e ia Maria.

3.- To Maria haàmaitairaa hia.

Eaha te tumu o Maria i haàmaitai hia ai ? no teie manaò, eiaha tatou e maere, no te mea o te Atua ana'e tei ite i te tumu no ta'na maiti raà huna ia Maria, ei farii e ei fanau i Ta'na Tamaiti i roto i teie nei ao. E teie maiti raà, aita ia te reira i riro ei faataaê roa raa ia Maria i te mau vahine atoà o te ao nei, e riro râ oia ei vahi farerei raà no to te ao nei i te Atua. I ônei, ua riro atoà o Maria ei hohoà no to tatou nei ao hara, e ta te Atua e haere mai nei e farerei. Eiaha atoà e, no te maitai e te mâ o to tatou ao, no te mea noa râ, o te huru mau teie no te ora raà Evaneria.

O vai o Maria i ta te Faufaa âpi parau raa ?

O Maria, ia au i ta te Faufaa apî parau raa, aita roa'tu ia e tuatapaparaa rahi no'na. E mai te mea ua haàmaitai hia oia, e ere te

reira no to'na mau maitai e rave rahi, e aore ra no to'na faaroo rahi. Aita atoà oia i taaê roa'tu i te mau vahine atoà o te ao nei, no tera mea, ua farii oia ei fanau mai i te Tamaiti a te Atua. Te mau vahine atoà, e aore ra, te mau taàta atoà i te ao nei, ua farii atoà ana'e ia i te Tamaiti na te Atua, mai ia'na atoà. No te mea noa râ, ua maiti te Atua ia'na no te reira, e tira atu ai.

E ia au noa â i te Faufaa apî, ua farerei atoà o Maria i te mauui rahi, na rotó i te opuaraa ino a te taata nei. Areà râ te parau no ta'na haamaitairaa i te Atua, ua riro ia ei parau rahi i roto i te ora raà o te Etaretia, no te mea, ua ite te Etaretia i te here rahi no te Atua i to te ao, na roto i tera hinaaro to te Atua ia tupu. Iho a teie farerei raà matamua roa no ta'na Tamaiti i to te ao, e ia farii poupou hia Oia i raro nei.

Eaha ia te auraa no te reira ?

Teie, te faaite mai ra te reira e, aita'toà ia to teie nei ao i hi'o ino noa'tu ia Ietu-Metia, ua farii atoà râ Ia'na ma te faaroo mau, te tahi ia hi'o raa'toà te nehenehe e parau hia no te haamaitairaa a Maria.

No tatou teie parau i teie nei mahana, eaha ia ta'na e haapii mai ra ?

E tià oioi atoà ânei tatou no te ohipa i faataa hia e na tatou e farerei ... E aore ra, e mea tiai roa ta tatou e na te Atua te taàtoà raa e rave mai. No reira, ia riro teie parau ei faaitoitōraa ia tatou.

Amene.

Irava opani : Taramo 106/2-3.

Ramon BROTHERS orometua.

AORAA NO TE MAHANA NOERA

TAIORAA : RUTA EV. 1/46-55
IRAVA : RUTA EV. 1/52-53

"E huri oia i te feia mana i raro i to ratou terono; e faateitei i te feia haehaa. E faai oia i te feia i ere i te maitai ; e te feia taoà rahi ra, e faaho'i ia oia ma te ore."

Faaroo noa ai tatou i te mau parau no teie pehepehe ta Maria, e hamata atoà tatou i te ite e te faataa mai nei oia i te hohoà no te hoê ao api tei taaê roa i teie ao ta tatou e ora nei i teie anotau hopeà nei. Te faateitei nei oia i to'na reo na roto i teie pehepehe tahito roa, i reira oia i te haapapuraa e no te mea ua horoà te Atua i te hoê tama na'na, noa'tu ia e ere i te mea tano roa, ua faahuri ê te Atua i te mau mea atoà. Papu atoà ra tatou e ua mataro roa te Atua i teie huru ohipa, oia hoi te horoàraa i te tama na te feia eita e mana'ohia ra e roaa faahou ta ratou tama. Ua ruau roa o Tara e o Ana area o Rahera ra eita oia e nehenehe e fanau, o ta te faufaa tahito ia e haapii mai nei ia tatou, e i roto i te faufaa api o te parau ia no Maria, te hoê vahine tei ore a i haaipoipo e tei hapu.

Ia au mai ta tatou e ite ra, e mea na roto i to'na ra puai e to'na mana to te Atua ohiparaa i roto i teie nei ao, na roto i teie nei tama, no te faahurueraa i te mau peu atoà, e te mau faanahoraa matarohia e te taata. E faatupu oia i te peapea i rotopu i te feia mana e e huri ia ratou mai nia mai i to ratou mau terono e, "e faateitei oia i te feia haehaa". Ua ite maite o Maria e, e Atua mana teie e te puai, o tei ohipa i roto i te aamu o teie nei ao, e na roto i ta'na raveà i roto i to'na iho oraraa, te faatupu nei oia i te tahi tauraa rahi no te mau mea atoà. Te haerea mai no teie Atua, ua faatupu ia i te tauraa e ere noa i roto i to'na oraraa faaroo. Oia mau, aita te Atua e hinaaro noa e ia tupu te tauraa i roto noa i to tatou mau aau, ua riro atoà ra ei Atua tei faatupu roa i te tauraa i roto roa i te oraraa poritita, te faanahoraa oraraa vaamateinaa e te oraraa no te pae imiraa faufaa no te mau taata atoà, ia au mai ta'na i faatupu i roto i te oraraa o Maria.

Teie nei ra te vai ra ihoa te feia e farii maitai mai i teie mau parau, e ua riro ia ei parau oaoa no ratou. Te vaira te mau taata veve e te haehaa i roto i teie nei ao e te feia paruparu o te tiai maite ra i te haerea mai no teie huru Atua. Teie huru pehepehe ta Maria e faatupu ia i te oaoa i roto i to ratou mau aau. Ua hio mai te Atua i teie tamahine ia Maria e ua faahuru ê roa i to'na oraraa. E ite mai teie nei Atua e, e faaroo mai oia i te feia riirii, tei faainohia e tei faatitihia. Aita oia i riro ei tiai no te faufaa e te taoà a to teie nei ao, te ohipa ra ra oia no te feia veve, e tei ore roa'tu e hinaaro i te hoê taoà, te ohipa nei oia no te feia tei ere. E mai te mea hoi e o te reira te hinaaro o te Atua, eiaha ia teie nei feia ia riro faahou ei titi na te feia taoà, ia tauihia ra to ratou tiàraa, ia tauihia to tatou mau tuàtiàtiraa, ia riro tatou paatoà ei mau hoa, ei mau taeae, oia hoi ia tuàti, ia aifato te mau taata atoà. Ua ite hoi tatou e, aita roa'tu e tuàtiraa papu e tupu mai te peu e eita tatou e haafaufaa i te tahi mau taata o te auahaati ia tatou, e tae noa'tu tei vai atea noa ia tatou. Ia au mai ta tatou e ite ra ua riro teie nei pehepehe ta teie nei tamahine mai te hoê parau o te faatupu i te hinaaro o te Atua e ia riro te rê i te feia tei ere na roto i te puai manahope o te Atua tei ia'na ra te mau mea atoà.

Ia hio tatou i teie pehepehe ta Maria, e hamata atoà i te o mai i roto i to tatou mau feruriraa e, mai te peu e, e parau maitai teie no te feia veve, ua riro ia ei parau peàpeà no te feia taoà rahi. Oia hoi e hamata atoà te mau taata e taoà rahi ta ratou i te matau e te uiui noa i roto ia ratou e eaha hoi te ohipa e ravehia no ratou. Mai te peu e e parau mau o teie ta Maria e pehepehe nei ua riro ia teie himene, ei piiraa ia faatupuhia te orureraa hau, no te mea o te reira mau te huru feruriraa o ta tatou i mataro noa. No te mea ia ohipa te Atua no te feia riirii anaè, te faahapa ra oia i te feia taoà rahi, te feia mana e tae noa'tu i tei mau i te faatereraa o teie nei ao. Ia hamata tatou i te feruri rii i teie mau parau, te o maira ia te mana'o e, e tupu te mau tauraa rahi i roto i ta tatou mau faanahoraa i mataro noa.

E tià ia tatou ia hamana'o atoà e o teie te huru o to te Atua ohiparaa i roto i teie nei ao. Hou aè tatou a haamau oioi roa ai i to tatou mau mana'o, e hio rii na tatou i te mau mea e auahaati nei ia tatou, i teie ihoa ra mau tau no te Noera. A hio na i te huru o te mau ohipa e nehenehe e tupu mai, mai te peu e farii tatou i te tamaiti a te Atua ia haere mai i roto i teie nei ao. Te vai nei te mau ohipa ta tatou i ore i mataro na, e inaha ua tupu. E te tahi atu mau ohipa o ta tatou i manao e eita e tupu faahou e inaha ua tupu. E parau na vau no te tahi mau peàpeà to tatou, ia tae i teie mau taime ei reira tatou e tamata ai e hio i to tatou hape. E te vai ra te tahi mau faaotiraa ta

tatou, no te pae anei no te faaitiraa i ta tatou mau haamauaraa, e inaha no te oaoa no teie oro'a ua tau i teie huru faaotiraa a rave atu ai tatou i ta to tatou varua e hinaaro ra. E tupu atoà te tahi mau farereiraa mana'o ore hia, i rotopu ia tatou e te tahi mau taata tei ore i mana'o hia e e farii faahou tatou. E faufaa atoà hia te mau taata ta tatou i ore na i tau'a. Mai te mau tamarii, i roto i teie nei a'o, o te tamarii ihoa te ore e haapa'ohia nei, areà ia tae i te Noera to ratou ia te parau e faaroo pinepinehia. Na reira atoà te feia veve, te otare e tei ruhiruhia, ia tae i taua taima ra ei reira ratou e fana'o ai i te tahi tuhaa taaê no te tauturu no roto mai i te mau taiete e haapa'o nei ia ratou mai te tatauro ura, te mau taatiraa faaroo e te vai noa'tu ra.

E riro te taata e rave rahi i te mata'u i te pehepehe a Maria e te parau o ta Itaiia e faatia ra, te feia taoà rahi ihoa ra e te feia mana, teie ra te moehia ra te parau no te here o te Atua. A hio na i te huru o te oaoa o te tupu ra i roto i te aau o tei mihi noa na, te feia veve e te otare, e ere anei i te mea oaoa, ahiri mai te reira aè i te mau mahana atoà. E ere i te tahi ohipa riàrià e tià ai ia tatou ia mata'u e ia taia i te auraa o te poroi e vai ra i roto i teie parau no ta tatou irava : "E huri oia i te feia mana i raro i to ratou terono ; e faateitei i te feia haehaa. E faai oia i te feia i ere i te maitai ; e te feia taoà rahi ra, e faaho'i ia oia ma te ore."

Eita e tià ia tatou ia mata'u, e tano ra ia tatou ia pure amui ma te ani e, "Ahiri aè e tià ia Noera ia faaea mai e hope atu ia matahiti, eiaha oia ia ore faahou." Ia fana'o noa tatou i te mau tapa'o no te Aroha otià ore o te Atua, ia ite noa'tu tatou i te oaoa i roto i te aau o te mau tamarii, te feia tei ore i haapa'o hia na, te feia otare te veve, eiaha ratou ia faarue faahouhia o ratou anaè.

I te tahi mau taima e ere i te mea faufaa na tatou ia haapa'o atu i te huru no te parau e parauhia mai nei ia tatou, mea maitai ae'ra no tatou ia ara i te taima a parauhia mai ai ia tatou ra taua parau ra, e hio iho ra tatou i te parau no te here o te Atua e ta'na e faaue maira ia tatou. Ia rave tatou i teie huru i reira mau tatou e hamata ai i te haapa'o i te hinaro o te Atua.

Iaorana.

Ralph TEINAORE

PURERAA PO MATAHITI

TAIÒRAA: Itaia 55/1-5 - Tar 76

AROHARAA:

E hoa here mā, i te hopeà o teie matahiti te hinaaro nei au e parau atu ia òutou paatoà na;

Ia ora na i roto i te aroha o te Atua i to tātou farereiraa i teie pō hopeà no teie matahiti 1991. Oia mau, ua ratere mai nei tātou i teie matahiti e maoti te aroha o te Atua i faatae mai ia tātou i teie pō i tià roa ai ia tātou ia haamaitaì ia na. Ua ìte aè nei tātou i te mau òhipa o ta tātou i haa mai. Te vai ra o tei manuia, e te vai atoà ra o tei òre roa atu i tae i nià i te vahi o ta tātou i ôpua. Ua rau te mau fifi o ta tātou i farerei mai e aita atoà tātou i faaea noa i roto i te hau. Ua riro rā te reira ei faaitoitoraa ia tātou i roto i te taviniraa, i roto i te ìmiraa i te mau rāveà atoà no te tupuraa o te patireia o te Atua i teie nei ao.

FAAITOITORAA

I muri aè i to na faaìteraa i to na huru metua i mua ia lerutarema, te fariu nei te Atua i mua i to na mau taata o te ineine nei i te faaea faahou i roto i taua òire ra, e te tiàoro nei ia rātou, mai roto atu i te vaha o te perofeta ia faaroo mai i to na reo.

Ia faaoroo tātou i teie mau irava, e tià ia tātou ia parau e, te faaite nei te perofeta i te tahi mau parau òaòà e te mahanahana hoì ia faarookhia. E mau parau teie o tei tano maitai ia parauhia i mua i te mau taata o tei farerei na i te mau àti i roto i te tau no te tītīraa. I teie nei, ua tae i te tau no te òaòàraa. Te ìriti nei te Atua ia rātou mai roto atu i taua tītīraa no te faahoì i to rātou fenua aià, i roto i to rātou mau ùtuafare.

Teie rā, i teie hoìraa no rātou i te fenua tapu, te hinaaro nei te perofeta ia haamanaò faahou rātou i te maitai rahi o te Atua e te faufaa o ta na parau ia faarookhia.

E piti manaò e hiti nei i roto i ta tātou nei taiòraa.

Te manaò matamua, o te riroraa te parau a te Atua mai te māa hoo-òre o tei faatupu i te ora i roto i te taata e àmu i taua māa ra. te haapapu nei teie manaò i te maitai taaê o te Atua tei vaiho tamau i to na aroha i nià i to na nunaa.

Te piti o te manaò, o to te Atua ia haapāpū faahouraa i te faufaa o ta na i fafau i to na tavini ia Tavita. Mai te mea ua pau Iteraera i te mau hau i haru ia na, i teie nei ua pau taua mau hau ra. Te riro faahou nei Iteraera mai tei ìtehia i te tau no Tavita ra. E riro ò ia i teie nei ei hiòraa na te mau nunaa, e e haere mai rātou e haamori i te Atua mau.

E tamata na tātou i teie nei e hiò i teie na manaò e piti nei i roto i to tātou oraraa i teie mahana. I roto i te roaraa no te matahiti i haerehia mai e tātou e i roto i te tau o ta tātou e tomo atu nei. E mea na hea to tātou faaòhiparaa i teie na parau, mai te mea ua

faaòhipahia, e aore e na hea tātou i teie nei no te mau tau i muri.

Oia mau, i te pō hōpeà no teie matahiti e tià anei ia tātou ia parau e, ua riro mau te parau a te Atua mai te māa hoo-òre o tei faatupu i te itoito i roto ia tātou. Ua riro mau anei taua māa ra ei faahinaaroraa na tātou i te mau taime atoà. I rōto i teie tau ta tātou e tià nei, te ìte nei tātou i te rahiraa no te mau parau faatiani o tei faatupu i te hinaaro i roto ia tātou. E riro paha i te tahi atoà taime ua hahi atoà na tātou i mua i taua mau parau ra. E ia hiò maitai tātou, te ìtehia ra e, te vai atoà ra ta rātou huru faaiteraa i te parau no te ora, i te parau no te itoito, e aore ra i te parau no te hoê tiaitururaa. E riro e ua apiapi atoà to tātou tiaturiraa, to tātou faaroo i taua mau reo ra. E mea maitai i teie nei ia faaroo faahou tātou i teie pehepehe ta te perofeta e vauvau nei i mua ia tātou i teie pō. Ia faaroo tātou i taua anaè ra reo, te reo o te Atua, ia fāriu to tātou aro ia na, i te ora hoo-òre o ta na i horoà mai no tātou.

Te piti o te manaò, o te faufaa ia o ta te Atua e fafau-faahou nei i to na nunaa, o tei riro mai te hoê taoà horoà. No te faaroo o tō na tāvini i horoà ai te Atua i te hanahana e tura ia na. No te faaroo i riro ai Iteraera ei hiòraa na te mau nunaa.

No tātou nei, ua fafau atoà te Atua ia tātou i te hoê faufaa. Mai ta na i na reira i to na nunaa. Na roto i te Metia ua ò tātou i roto i taua faufaa ra. E taua tiaitururaa i ìtehia i taua tau ra, o ta tātou atoà ia e ora nei i teie mahana. Teie rā, e mea tià ia tātou ia ui e, te vai mau anei rā taua tiaitururaa ra i roto ia tātou.

No te mau tamarii Iteraera ua riro ia mai te haamata-âpī-faahouraa. E faatià faahou ia lerutarema, e faatià faahou i te nunaa i raroaè i te arataïraa a te Atua. Te mau hape i mairi, te tumu i tae ai rātou i roto i te tītīraa, ua riro ia ei haapiïraa ei faahiò faahouraa ia rātou i te Atua.

E tià atoà ia tātou ia parau e, ua riro te reira ei haapiïraa atoà na tātou. E faaitoito rā i teie nei i te haamau i to tatou faaroo i nià i teie faufaa ta te perofeta e faaïte nei.

No reira e hoa here mā e, ia itoito ā òutou i roto i te faaroo e ia maitai no te matahiti o ta tātou e tomo atu nei. Ia tauturu mai te Fatu e ia arataï ia tātou i nià i te èà o tana i hinaaro no tātou.

Taarii Or.

AORAA NO TE MATAHITI API

(Mahana Toru 1 no Tenua 92)

TAIORAA : TARAMO 121

IRAVA 7 : Na lehova oe e tiai i te mau ino atoà ; na na oe e tiai ia ora.

Ei omuaraa i te manao, ia ora na tatou i te Aroha o te Atua i to tatou farereiraa i teie Matahiti Api. Ia haamaitai hia te Atua, te Tumu o te mau mea atoà tei aratai mai ia tatou i te roaraa o te matahiti i mairi e tei faatae mai ia tatou i teie mahana matamua no teie tau âpi ta tatou e omua nei. Te tioraa tei tapao hia no teie mahana o te Taramo 121 e ua rave hia mai te irava 7 ei irava faaitoitoraa ia tatou. Te na ô ra ta tatou irava : "Na lehova oe e tiai i te mau ino atoà, na na oe e tiai ia ora."

E hoa here ma, tei roto ta tatou parau i te tahi pehepehe tei fatu hia e vetahi mau taata faaroo tei faatupu i te tahi tere perenina i te oire no lerutarema. Eita e ore e ua tae i te taima e hoi ai teie mau taata i te vahi no reira mai ratou, i manao ai ratou i te taima ra. Te reira mau te ohipa e faatia hia ra i roto i ta tatou Taramo 121. I roto i na irava matamua e 2, te faaite ra te taata perenina i to na manaonao rahi i te parau no te hoiraa, i faahiti ai oia i te parau no te tauturu ia na. I nia i te ea no te hoiraa, aita oia i ite i te mau fifi te iri mai i nià ia na. To na ra tiàturiraa rahi no te tauturu ia na, tei nia ia i te Atua ia au i ta na faîraa faaroo : "No ô ia lehova ra te tauturu ia ù, o tei hamani i te mau rai e te fenua."

I roto i te Taramo 121, e au ra e 2 taata e ohipa ra. Ua hio mai tatou i te tuhaa a te taata tere perenina. Te 2 o te tuhaa, e tia ia tatou ia parau e haamata na te irava 3 e tae atu i te hopeà o te Taramo. Te taata na na e rave i teie tuhaa, e taata toroà ia no te mea te faaite ra oia i te huru e te ohipa a te Atua. Ua papu ia tatou i roto i te nunaa Ati luta, na te Tahuà te reira tuhaa e rave oia hoi te faaiteraa i te huru e te ohipa a te Atua. Te ite ra tatou i te tuhaa a te Tahuà o te faaitoitoraa i te taata perenina na roto i te faaiteraa i te huru o te Atua e te ohipa ta na e rave no na.

Te na ô ra ta tatou irava :

"Na lehova oe e tiaï i te mau ino atoà, na na oe e tiaï ia ora."

Teie atoà te parau faaitoitoraa ia tatou i teie Matahiti Api. Mai te taata tere perenina i nià i te eà no te hoïraa i te vahi no reira mai oia, hoê atoà tatou i te roaraa no teie Matahiti Api, aita tatou i ite i te mau fifi rau te iri mai i nià ia tatou. Ia au ra i te reo no ta tatou irava, te faaitoito hia nei tatou e tiaturi i to tatou Tiaï. O te Atua to tatou Tiaï. Aita e Tiaï ê atu e ora ai tatou, e maitai ai tatou. Te titauroa a te papai Taramo ia tatou i teie mahana matamua o teie Matahiti Api e no te taatoàraa o teie Matahiti Api, e titauroa no te ORA ta te Atua e faafanao ia tatou. Ia farii tatou e na te Atua e Tiaï ia tatou, ua ora tatou. Eita tatou e ora mai te peu eita tatou e farii i teie Tiaï. Eita tatou e ora mai te peu eita tatou e tiaturi i teie Tiaï. Te titau ra te Tahua i te tiaturiraa o te taata tere perenina, te reira atoà te vahi ta te papai Taramo e titau mai ra ia tatou oia hoi to tatou tiaturiraa.

Ia au te reo no ta tatou irava : **"Na lehova oe e tiaï i te mau ino atoà, na na oe e tiaï ia ora"**, ua papu ia tatou i te ohipa ta te Atua e rave no tatou e te maitai ta na e faafanao ia tatou. Na tatou atoà e haapapu i to tatou tiaturiraa ia na i teie mahana e te roaraa o teie Matahiti.

Irava opaniraa : Teuteronomi 6/5.

"E hinaaro oe i to Atua ia lehova ma to aau atoà, ma to varua atoà e ma to puai atoà."

IA ORA NA

Tehaapapa orometua.



EKALESIA EVANELIA NO POLINESIA FARANI
Veà Orometua EPM
VEA OROMETUA

191

N° 37

1992

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

Pāōfai, i te mahana maha 2 no eperera 1992.

RECULE
29 AVR. 2002

I te mau taeae òrometua e tauturu-òrometua
e vai nei i roto i te mau pāroita atoà
o te Etārētia Evaneria,

Ia ora na i te aroha o te Atua, outou e to outou mau utuāfāre e
tae noa atu i te mau pāroita atoà ta outou e āpee nei mā te turuhia e ta
outou mau Apooraa Tiātono.

E hoa here mā e, terā mai ta tātou Veà Orometua ei taura tāamu
ia tātou e òhipa nei i roto i tera pāroita e tera pāroita e ei tautururaa
atoà ia ratou i mua i te Hepetoma Moà, te pureraa Revaraa e te
Penetetote e fa mai nei muri aè i te parau no te ôroà 5 no Mati.

No reira, te faahāmanaòhia atu nei outou e, e faatiàhia te ôroà
Euhari:

- i te **Tapati no te mau Amaa**, 12 no eperera 1992,
- i te **Faraite Moà**, mahana pae 17 no eperera 1992,
- i te **Tapati Tiafaahouraa**, 19 no eperera 1992
- i te **pureraa Revaraa**, mahana maha 28 no me 1992
- e i te **Tapati Penetetote**, 7 no tiunu 1992.

No te Faraite Moà (mahana pae 17 no eperera), e haamata ta
tātou pureraa i te hora 8 i te poipoi e e faaòti i te hora 2 i te avatea, na
roto i te ôroà Euhari e ia au i te tereraa i matarohia e tātou.

E toru tuhaa i roto i taua pureraa ra :

1. te parau no te Faraite Moà
2. te haapaeraa maa e te pure
3. te faatiàraa i te ôroà Euhari

No te papa haamori (Rituria), a faaòhipa i te hohoà piti i ravehia e
tātou i te matahiti i mairi aè nei (puta matie) e a ora pāpū tātou i te
parau no taua mahana ra e no taua hepetoma ra.

A farii mai i te tapaò aroha o te Apooraa Faatere e ia itoito ā tātou i nià i te mau òhipa atoà ta te Fatu i pupu mai ia tātou, mai te Oroà Faatupuraa Parau e fatata nei ia tātou.

I te ioà o te Apooraa Faatere,

Te Peretiteni,

A stylized, handwritten signature in black ink, consisting of several overlapping loops and lines.

Jacques IHORAI orometua

HEPETOMA MOA 1992

TAPATI NO TE MAU AMAA

(12 no Eperera 1992)

“ ... Eaha orua i rave ai ? E parau atu, no te Fatu teie e tia'i ... ”

Mareto 11/Ir. 3 v.r.

laorana tatou i te fārerei raa i roto i te here o te Fatu.

E hoa here mâ, teie mai nei tātou i roto i teie tapati. E tapati huru taaê rii no tātou to te hui faaroo no te mea e tapati hoi e ô ai tātou i roto i te tahi parau faahaamanaò raa o te rave hia nei hoê taimé i te matahiti, oia hoi te faahaamanaò raa i te parau no to te Fatu tomo hanahana raa i roto i te oire mo'a no IERUTAREMA. E nehenehe ia parau hia, eere roa'tu teie haere raa no Ietu i roto i teie oire no IERUTAREMA no te taimé matamua roa. Ua faahiti na te mau Evaneria i roto i te tahi atu mau taimé to Ietu haere raa i reira e te tahi mau ohipa rii ta'na i rave. Teie râ, aita IERUTAREMA i riro ei vahi matamua roa i roto i ta'na mau tapura ohipa e to na mau tere. Aita'toa Ietu i haafaufaa ore i teie oire mo'a. Ua mana'o râ oia e, e haamata oia i ta'na mau ohipa na te mau oire e te mau fenua rapae atu ia IERUTAREMA, oia hoi na te mau vahi o ta'na e mana'o ra ia parau oioi hia te parau no te patireia o te Atua. Ia oti, i reira e faaho'i mai ai i IERUTAREMA, . I teie taimé, te ite râ tātou e, tei nia o Ietu i te e'a no te haere raa'tu i IERUTAREMA, te vahi o ta'na paha i ore i mana'o e e rave hia te tahi ohipa rahi no'na, te tahi ohipa taaê no taua tomo raa no'na i roto i taua oire ra. Eaha te mana'o i ô mai i roto ia Ietu ? E mana'o huru taaê rii ia, e mana'o o ta'na i faaherehere ia tae roa i teie taimé no to'na tomo raa i roto i teie oire. Eaha hoi taua mana'o ra ? Teie ia, to'na ia manao raa e eita oia e haere avae faahou, e rave râ oia i te tahi faurao e taua faurao râ o te hoê ia animara oia hoi te hoê pinia atini. Ahiri pai i roa'a mai i te mau teoroto i te rahi raa kilometa i haere avae hia e Ietu i roto i to na mau tere, i reira ia tātou e ite maitai e, e taata haere mau o Ietu. No reira, no teie vahi hope'a o ta'na i faataa i reira oia e faaea huru maoro rii ai, te haere nei oia na nia i te tua o te animara. No teie parau, oia hoi to'na maiti raa i te hoê atini, mai te mea râ e, ua ite atoa o Ietu i te vahi tei reira te atini te taamu raa hia e tae noa'tu hoi i te ohipa e tupu mai i te taimé e haere noa'tu ai te hoê taata e iriti mai i taua atini ra. O te parau ia ta Ietu i tuu atu i roto i na pue Pipi i to raua haere raa e tii i taua atini ra oia hoi o te parau ia no ta tātou irava tei na ô mai e :

“ ... Eaha orua i rave ai ? E parau atu, No te Fatu teie e tia'i ... ”

E hōa here mā e, e neheneh ia parau hia, i te omua roa raa ihoa no taua tomo raa no'na ra, aita Ietu i haafaufaa ore i taua parau ra ; noa'tu ua ite oia e, ua tohu te mau perofeta no te Faufaa Tahito no te parau no to'na tomo raa i IERUTAREMA, ua riro atoa rā te parau no te rave'a o ta'na e rave no taua tomo raa ra ei parau faufaa, ei parau o te faaite maitai i te nunaa i to'na huru mau. Eita paha e ore i mana'o na te tahi pae e, e na nia mai oia i te puaahorofenua, teie animara o tei faaōhipa hia e te mau Hui arii e to ratou mau nuu atoa i te taimē no te mau aro raa. E aore ia, ia amo hia Ietu i nia i te taponō o te tahi mau taata mai tei ite atoa hia no te tahi mau taata tia raa teitei, e hamani hia te tahi paepae maitai e amo hia'tu ai e te tahi mau taata. Aita roa'tu ia ! Te ohipa ta Ietu i rave o te hoē ia ohipa tei ore roa'tu i mana'o hia e te taata oia hoi te tiāturi raa e, e rave mai o Ietu i te hoē atini no te tomo atu i IERUTAREMA, inaha hoi, te atini, o te animara ia e faaōhipa rahi hia e te feia riirii i Paretetina no te uta raa i ta ratou mau maa rii e aore ra, te tahi atu mau ohipa. Hau roa'tu, mai te peu e, ua faa-Arii na te mau taata e rave rahi ia Ietu, teie a'e ia te faurao ta Ietu i maiti ?

E no reira i roto i taua tomo raa no Ietu i IERUTAREMA, eita e ore te vai ra te feia tei mauruuru i te ohipa ta Ietu i rave e tae noa'tu i te feia tei ore roa'tu i mauruuru, tei inoia ia Ietu no te mea i roto i to ratou mana'o, eita te reira e tia i te Fatu. Area rā no Ietu iho, te mea tei ore i tuāti hia e te taata, o ta'na ia i faariro ei ohipa tia ia au i to'na reo na roto i ta tātou irava "... No te Fatu teie e tia'i ..." Ia h'ō maitai hia, aita Ietu i hinaaro ia faateitei mau hia oia, o to'na rā Metua i te ao ra, noa'tu ia to te tahi pae faahotana raa ia'na mā te vauvau i te mau amaa raau i nia i te e'a. Eita e ore e mau rave'a rii rapae noa teie ta Ietu e ite nei, area rā, te mea mau e vai rā i roto i te aau o te nunaa e mea ē roa ia. To te huifaaroo nei, mai te peu e ua riro te parau no to Ietu tomo raa i IERUTAREMA ei mea hanahana, ua riro atoa rā ei ohipa tei faaineine ia Ietu no te amo e no te fā atu i mua i te mau hamani ino raa a te nunaa, ratou tei hurò na ia Ietu "*Hotana i te Tamaiti a Tavita*". Na roto atoà i te ohipa ta Ietu i rave, tei faaite mai i te huru no to'na faahaehaa raa ia'na, te rave raa i te huru no te feia riirii, oia hoi te feia tei ore i tau'a maitai hia i roto i te totaite.

E hōa here mā, mai te taimē no to Ietu tomo raa i IERUTAREMA, tei aratai ia'na i te taimē no to'na mau hāmani ino raa hia e tae noa'tu hoi i to'na pohe raa, e nehenehe ia parau hia, e mau ohipa ana'e ia o ta Ietu iho i parau i te omua roa raa no to'na tomo raa oia hoi

" ... No te Fatu teie e tia'i ... "

Ia maitai outou i teie tāpati no te mau Amaa, Iaorana.

Marama TAUIRA
orometua

HEPETOMA MOA 1992 Monire 13 no eperera

Taioraa : Mareto 14/ 53-65

“Ua parau atura Ietu, O vau ĩa ...”
(ir. 62)

I te mahana i tomo ai Ietu i Ierutarema, e nahoà rahi taata tei haaati ia'na, mai te mea e, no te faaite ia na e tei muri ratou ia na. I teie mahana, i mua i te aro no te tiripuna ati-luta, e taata atoà tei tià mai i mua ia na, eiaha râ no te faaite e, tei pihai iho ratou ia na, no te haapapû ra e, aita ratou i muri ia na.

To ratou huru e ta ratou mau pariraa tià-ore, ua haapapû mai ĩa i ta ratou faaotiraa : ia pohe Ietu.

No reira Ietu i mamû ai ! No te mea, aita te huru o te feia e haaati ra ia na e ta ratou mau parau, e titau ra i te hoê tauàraa-parau i rotopû ia na e o ratou, ia tià atoà ĩa ratou ia faaroo mai i to na manaò, ia nehenehe atoà ia Ietu ia paruru ia na.

I mua i taua huru ra o taua mau ite haavare ra, ua mamû Ietu. E taua mamûraa no Ietu, e tapaò atoà ĩa no to na tuàti-ore i te mau pariraa i parihia ai o ĩa. Ia faaoti anaè râ te taata i roto ia na i to na manaò patoi i te hinaaro o te Fatu, e mea maitai aè ĩa na na ia mamû.

I te taimè râ e tupu ai te hinaaro tauà-parau i roto i te aau o te taata, no te faaroo atoà i tana parau, no te turai ia na ia paruru ia na, eita ĩa e tia ia Ietu ia mamû faahou. No reira te parau nei o ĩa : “O vau ĩa (te Metia, te Tamaiti a te Atua i haamaitahia ra ...)”

Aita te taata i faaroo i ta na parau, oia ĩa, teie râ, ua faaitahia te parau mau.

Na roto i teie nei parau, te haamanaò nei tātou i te feia atoà e faautuàhia nei ma te ore e vaihohia ia ratou te raveà no te parururaa ia ratou. Te haamanaò nei tātou i te feia teretitiano atoà e faautuahia nei no to ratou faaroo i te Metia. Te haamanaò nei tātou i te feia atoà e faautuàhia nei noa atu to ratou faaiteraa i te parau mau. Te vai nei ratou i roto i terâ fenua e i terâ fenua i te ao nei. Eita râ e ore e, te vai atoà nei ratou i pihai iho ia tātou e aore ĩa i rotopû ia tātou iho.

No ratou, e tià roa ia tātou, i teie mahana ia pure ia faatupu te Atua i ta na parautià e ia turu atoà mai i to ratou faaroo. Amene.

HEPETOMA MOA Mahana piti 14 no Eperera

Taioraa : Mareto 14/66 - 72.

“Ua manaò ihora o ĩa i te reira ma te oto”. (ir. 72)

Te aaoaraa a te moa, te haapapũ ra ĩa i na tumu parau e piti : te parau mau a Ietu e te parau haavare a Petero.

Te parau mau a Ietu ia Petero : “ia tae anaè i te taimè e titauhia ai oe ia faaite i to oe faaroo iaũ, e huna oe i to oe faaroo !”

Te parau haavare a Petero ia Ietu : “eere au i te pipi na Ietu, O vai o ĩa a tià ai iaũ ia horoà i toũ ora no na ?”

Te aaoaraa a te moa, te haapapũ ra ĩa ia Petero i te parautià a Ietu e i ta na haavare.

Aita hoè taata aè i ite i te auraa no te aaoaraa a te moa maori rà o Ietu anaè ra e o Petero.

E rave rahi tei faaroo i te aaoaraa a te moa, e piti anaè rà tei ite i tona auraa.

No reira o Petero i oto ai

Aita tatou e faahapa nei ia Petero (o ta te Varua-Moà e faaapĩ ia tae i te mahana Penetetote) e o vai atoà hoi tatou a tià ai ia tatou ia faahapa atu ia na ? Ua hau atu anei to tatou huru e to tatou faaroo i te maitai i to na ? Aita anei tatou e huna atoa ra i to tatou faaroo i te tahi mau taimè, i mua i te hoè mau ohipa e tupu ra i roto i to tatou oraraa ? E i te reira mau taimè, ua tupu anei te manaò tatarahapa atoà i roto i to tatou aau ?

A tiàturi tātou e, te roi mata no Petero i tahe i taua ahiahi ra, e tapaò ĩa no to na fariiraa i te parau no ta na haavare o ta Ietu i faaite atea ia na. E tapaò ĩa no to na tatarahapa i te hape o ta na i rave aè nei. E tapaò ĩa no to na hinaaro i te haamata apĩ faahou e o Ietu i te parau no te taviniraa.

Te faĩraa i te faaroo i teie mahana, i te tahi atu mau fenua, eere ĩa i te parau ohie, e parau fifi rà inaha hoi te vai noa nei à te parau no te mau hamani-ino-raa ...

I ô tatou nei, aita e hamani-ino-raa e itea ra ia faĩ tatou i to tatou faaroo i teie mahana. Teie rà, ahiri e, e tupuraa na te mau hamani-ino-raa i te hoè mahana i ô tatou nei, e rahi anei te feia faaroo e toe mai o te faĩ i to ratou faaroo ? Amene.

HEPETOMA MOA Mahana toru 15 no eperera

Taioraa : Mareto 15/ 1-15 :

“E no te mea te hinaaro ra Pirato i te haamauruuru i te taata, ua tuu maira ia Parapa ia ratou ra, e oti aèra Ietu i te papaìhia e ana, ua tuu maira ia na ia faatataurohia”. (ir. 15)

Ua ite o Pirato i te parau mau : aita a Ietu e hara i rave e au ai i te ture a te Hau Roma ia faautuà ia na i te utua pohe. Aita râ i tià ia na ia rave i te faaotiraa o te faaora ia Ietu i te mau pariraa tia-ore. Aita o Īa i riro ei auvaha no te parautià, ua riro râ o Īa ei auvaha-parau no te parautià-ore e no te haavare.

Te mea o tei riro ei manaònaòraa na Pirato i ô nei, eere te parau no te hara-ore a te hoê taata o ta te nunaa ati-Iuta e titau ra ia pohe. O te parau râ o to na tiaraa, o te ere o Īa i te reira. No reira, e tià ia ravehia te mau raveà atoà no te tapeàraa mai i te tiaraa, noa atu e, eere i te raveà tià. O te peu Īa, e ravehia ra e Pirato i mua i te aro o te nunaa ati-luta : te haamauruuruua i te taata ia vai maoro o Īa i nià i to na tiàraa tavana.

Te mana i pûpûhia i roto i to na rima no te faaite i te parautia e no te faatupu i te parau mau, ua faarirohia Īa e Pirato, ei raveà no te faaupootiàraa i te parautia-ore e i te haavare.

Ua faautuahia te hoê taata parautià i taua mahana ra, no te mea aita te Ture i paruru ia na !

To tatou feia maitihia e aratai nei ia tatou i teie mahana, e feia Īa mai te feia atoà i pûpûhia te tahi hopoià na ratou i roto i te oraraa o te Etaretia, no te paruru i te nunaa i mua i te parautià-ore, no te tauturu i te taata i roto i to ratou mau hepohepo, no te horoà i te nunaa i te hoê mau faanahoraa-ohipa o te tapeà i te taata i roto i te hoê oraraa maitai, e te hau e te oaoa no te hanahana o te Fatu.

E hopoià rahi ta ratou e amo nei, e tià roa ai ia tatou ia haamanaò ia ratou i roto i ta tatou mau tumu pure, ia paruruhia ratou i te mau ino atoà e i te mau faahemaraa atoà i fariihia e Pirato.

E au atoa râ teie nei parau ia tatou tatai-tahi inaha hoi no te parautià e no te parau mau i titauhia ai tatou e te Fatu.

Tei hea to tatou vairaa i teie mahana i mua i teie parau ? Amene.

HEPETOMA MOA Mahana maa 18 no eperera

Taioraa : Mareto 15/42 - 47 :

“Ua maere ihora Pirato i te mea o ĩa i pohe vave, ...”

Ua pohe Ietu i nià i te tatauro, areà rà tauà poheraa no na ra, ua riro ĩa mai te hoê ohipa tei faaaueue i te aau o Pirato. Eita te taata e faatataurohia e pohe vave. Ua ite o ĩa inaha hoi o ta na teie ohipa tumu, areà teie, oia ĩa. E tapao ĩa e, i ô mai i taua poheraa ra, te vai ra te hoê ohipa apî i tupu, aita rà o ĩa i ite e, eaha rà ? Ua ara rà o ĩa i te ohipa i tupu i lerutarema.

Ua pohe Ietu i nià i te tatauro, areà rà taua poheraa ra no na, ua riro ĩa mai te hoê ohipa tei faariro ia Iotefa i Arimataio ei aito mau no te Metia, ei taata mau no te Patireia o te Atua inaha hoi aita o ĩa i taiâ i te faaite ia Pirato i to na tuatiraa i te Metia. E tapao ĩa e, i ô mai i taua poheraa ra, te vai ra te hoê opuaraa faaora tei faaineine-atea-hia e te Atua no teie nei ao. Ia nehenehe i te taata ia ora, i pohe ai o ĩa.

Ua pohe te Fatu i nia i te tatauro, e parau mau, areà rà taua poheraa ra, ua riro ĩa mai te hoê ohipa tei faahaamano mai ia tatou i te ohipa a te nuu faehau i roto i te oraraa o te taata e te ohipa a te Atua i roto i teie nei ao na roto i ta na Tamaiti ia Ietu. E tapao ĩa e, i ô mai i te parau no taua poheraa no te Fatu ra, te vai ra te hoê ohipa taaê i tupu o tei haapapûhia e te raatira hanere ia Pirato oia hoi i te faito ino hopeà o te taata i nià i te tamaiti a te Atua e i te faito hopeà no te Aroha o te Atua i te taata.

Ua pohe Ietu i nià i te tatauro e ua tuuhia i roto i te hoê menema i paohia i roto i te mato, a hurihia atu ai te hoê ofai i te uputa o taua menema ra, ei haapapûraa, e parau mau e, ua pohe mau roa Ietu i te rima o te taata, areà rà taua poheraa ra, e faarirohia ĩa e te Atua ei mauhaa na na no te haamou-roa-raa i te mana no te hara, no te pohe e no te faaite-atoa-raa i te taata e, no te ora e aita atu tatou i hamanihia ai, eere rà e no te pohe.

O te reira mau anei te tiaturiraa e vai ra i roto ia Maria mâ i taua ahiahi ra e i roto ia tatou tatai-tahi i teie mahana ? Amene.

TAPATI TIAFAAHOURAA

(19 no Eperera 1992)

Taiòraa : Mareto 16/ 1-8

Irava tumu : 16/3 : “Na vai e huri i te ôfai i te ùputa o te menema ra ia tatou ?”

E hoa here ma, e ôfai teie i mua i te ùputa o te menema o to tatou Fatu. E ôfai rahi mau e te teimaha hoi no teie mau tino vahine e haere nei e faatavai i te tino pohe o to tatou Fatu. No reira, eita tatou e maere i te huru no ta ratou uiraa : “Na vai ra e huri i te ôfai i te ùputa o te menema ra ia tatou”.

Faaite mai te reira i to ratou manaò peàpeà e to ratou hinaaro rahi ia matara iho a taua uputa ra, e ia nehenehe ia ratou ia rave hope roa i ta ratou ôhipà. Ia tapae ra ratou i te menema o to tatou Fatu, e maere rahi to ratou i te iteraa e, aita ra te ôfai tei haapeàpeà i to ratou manaò, i mua i te ùputa. Eaha te parau e tano ia parau.

E hoa here ma, te uiui raa ta ratou i uiui noa, na te eà tià, òre noa atu e tià ia ratou ia pahono, ua faatupu hia ra mai ta ratou i hinaaro. Aita atoà ratou i ite o vai tei faatupu i taua ôhipa ra. Tatou atoà, aita atoà tatou i ite mata i te tupuraa no taua ôhipa ra. Na roto ra i te mata o te faaroo, eita tatou e hape i te parauraa e, na te Atua teie ôhipa i faatupu. O te Atua tei pahono i te uiraa a na vahine tootoru. E na roto i to na mana rahi, ua tià ia na i te faatupu i taua ôhipa ra. Hau atu ra i te reira, ua faaôhipa atoà oia i to na mana no te faatià raa i to tatou Fatu, mai roto mai i te pohe.

Ua riro te reira ei parau àpì òaòà, eiaha noa no taua mau vahine ra, no tatou atoà ra i teie mahana. Te tumu ia tatou i tāpaò ai i teie mahana, eiaha noa ei mahana pureraa no tatou, ei mahana hamanaòraa atoà ra, i te Tiafaahouraa o to tatou Fatu.

Te tiàfaahouraa o to tatou Fatu, eita te reira e tano ia faaau hia i te tiàfaahouraa o Rataro. Inaha hoi, o Rataro, ua pohe faahou ia. Areà to tatou Fatu, eita ia oia e ite faahou i te pohe. Ua upootià to tatou Fatu i nià i te pohe. Aita to te pohe e mana faahou i nià i te Tamaiti a te Atua. Ua riro te reira ei faaiteraa ia tatou e, mai te reira atoà ia tae mai te Patireia o te Atua. Te feia e ô atu i roto, eita ia e ite faahou i te pohe. E ora mure ore ra to ratou.

Te Oroà Pata, ua riro ia ei faahiòraa ia tatou i te huru no to tatou Fatu i muri ae i te Tiàfaahouraa. Ua riro atoà ra, ei faahiò raa ia tatou i to tatou iho huru, i muri ae i to tatou tiàfaahouraa.

Te Oroà Pata, ua riro ia ei faaiteraa i to te ao atoà e, tei te Atua ra te parau hopeà, eere ra tei te taata ra. Eere atoà tei te pohe. Pohe noa ai tatou, ua ite ra tatou e, e faatià faahou hia mai tatou ia tae i te tau mau ra.

Te tere o teie mau vahine i te menema, e tere peàpeà ia. Peàpeà i te mea e, ua pohe to ratou Fatu. Peàpeà atoà, no te mea, e ôfai rahi teie e faaapiapi nei i ta ratou ôpuaraa. Nà roto ra i te mana o te Atua, ua tià ia na i te tau i to ratou huru. Ua tatara o ia i te ôfai i te ùputa o te menema. E hau atu i te reira, ua faatià oia i tei manaò hia na e, ua pohe.

E hoa here ma, te tere peàpeà o taua mau vahine ra, ua riro ia i teie nei ei tere òaòà rahi. Eere atu ra, te pohe ta ratou e farerei nei, o te tiàfaahouraa ra o te ora mure ore teie ta ratou e farerei nei. I taua taima ra, te ùputa no te pohe, ua riro ia ei ùputa no te Ora, ei ùputa no te Tiàfaahouraa, ei ùputa no te tamaraa i to ratou mau peàpeà, ei ùputa no te òaòàraa.

I roto i ta tatou parau, eere i te mea hape ia hiò tatou i taua ôfai rahi ra, mai te tahi taoà tei faataupupu ia tatou, ia òre tatou ia farerei i tei Tià-faahou, ia òre hoi tatou ia ite i te ora-mure-ore e te òaòà raa mau e parau hia ra.

Eere i te mea hape ia faaaui hia taua ôfai rahi ra i to tatou mau manaò iino e te pohe hae. Oia ma, i te tahi taima, te manaò ino nei tatou e te pohe hae nei hoi i to tatou mau taeae rii. No tera anei mea te maitai ra ta ratou ôhipa, aore ia, ta ratou mau ôpuaraa. E na roto hoi i to tatou manaò inoraa i taua mau taeae rii ra, ôpua atura tatou e haafifi ia ratou i roto i ta ratou ôhipa e ta ratou mau ôpuaraa. Ia òre hoi ratou ia maitai mai.

Eere atoà i te mea hape ia faaaui hia taua ôfai rahi ra i te huru no ta tatou haavaraa i to tatou mau taeae rii. Inaha hoi, i te tahi taima, te faahapa hape noa nei tatou i to tatou mau taeae rii, ma te òre e titorotoro maitai i te tupu mau raa no te ôhipa i rave hia. E to tatou na reira raa, ua riro te reira ei haafifiraa i to tatou mau taeae rii tei òre roa e maramarama i te huru no ta tatou haavaraa ia ratou.

Eere atoà i te mea hape ia faaaui hia taua ôfai rahi ra i to tatou mau paruparu. Paruparu i roto i tera manaò, o te òreraa tatou e amo i ta tatou hopoià, na roto i te tahi fifi tei tupu, o tatou hoi te tumu. E na roto i to tatou paruparu, imi atura ia tatou i te tahi mau taata rii, ei tarae hara na tatou. Mea maitai tatou e faaitoito i te amuraa i ta tatou hopoià, no te mau hape, o tatou iho hoi te tumu, i te tapuni i muri i to tatou mau taeae rii.

No te mau vahine tei haere mai i te menema, ua pahono te Atua i ta ratou uiraa. No tatou nei, e faaitoito atoà tatou i te aniraa i te Atua, ia tatara mai i te ôfai e faaapiapi ra ia tatou ia farerei i tei Tiàfaahou.

E faaitoito tātou i te pure i te Atua, ia òre tatou ia haafifi noa i to tatou mau taeae rii a òre tatou e ite i te ora-mure-òre. E ia òre hoi te Atua ia tatara i te ôfai, eere ia o tei tiàfaahou ta tatou e farerei, maoti ra, o te tino pohe o to tatou Fatu.

No reira, mea maitai iho à i te Atua ia pahono mai i ta tatou aniraa ia faufaa hia te Tiàfaahou raa o to tatou Fatu, no tatou. Amene.

AVAE Martin
orometua

TE MAHANA REVARAA
(Mahana maha 28 no Me 1992)

Taioraa : Ruta 24/ 46-53
Ohipa 1/ 1 - 11.

Faaitoitōraa : Ev. Ruta 24/ 49
Ohipa 1/9.

Ruta 24/ 49 : E inaha, na'u e tono mai ia outou nei, to taù Metua i parau maira, e parahi ia outou i te oire nei i Ierutarema, e ia noa mai to outou itoito no nia mai.

Ohipa 1/9 : E te parau noa ra oia i taua mau parau nei, e te hi'o noa maira ratou ia'na, rave hia'tura oia i nià, e vehia maira oia e te ata, moe atura oia i to ratou mata.

E hoa here ma, te mau taeae e te mau tuahine, ia ora na amui tatou i te aroha o te Atua i teie mahana, mahana haamanao raa i te revaraa e aore ra mai tei papaihia i roto i te parau a te Atua i te piti no ta tatou taioraa iau i te Tarena Pipiria.

Ohipa 1/2, oia te mahana i ravehia atu Ietu i to'na metua.

E tae roa ae nei i te mahana i rave hia tu ai oia i nià ra.
Ohipa 1/2 v. m.

Mai te mea tei roto tatou i teie Evaneria no Ietu iau i te hioraa a Ruta, ia ite atoà ia tatou e, o Ruta e ere oia i te Ati-Iuta, to'na toroà e taote ia, aita oia i ite ia Ietu mai te mau apotetoro ra, to'na ite i te parau no Ietu no roto mai ia Petero ma e te tahi mau api parau e faahiti ra i te mau ohipa a Ietu. E taata ra teie, tei faarii papu ia Ietu Metia i manao ai oia papai i teie puta ei faafaite raa i to'na mau taeae no te mau pae fenua hereni i te hoê hoa ra taata tei riro paha ei hoa rahi no na, oia hoi o : TEOPHIRO.

Evaneria Ruta 1/3 : E o vau atoà hoi, no te mea ua itea papu hia e au te mau parau atoà mai te matamua mai ia, manao ae nei au e mea tià ia papai tuatapapa'tu i taua parau ra ia oe na.

Te piti, no te parau aita teie puta ta'na i faaea noa i te irava 53 no te pene 24 e puoi mai ra te puta ohipa i nia iho no reira i taio hia atu ai i muri, ite atura tatou e, te tuati ra na parau e piti e te tuati ra na manaò e piti.

E parau nehenehe mau teie, e parau oaoa e te mau iui atoa ra. Parau oaoa no te mea te haapapû maira teie taioraa ia tatou e : E tamaiti mau teie na te Atua. E parau mau iui no te mea, teie mau pipi, teie mau taeae te parahi noa na i pihaiho ia'na, tei ite i to'na huru, to'na maitai, to'na haehaa, to'na aravihi i te parau a te Atua, tei riro ei haapii no ratou, tei riro ei faaaô no ratou e tei riro ei metua no ratou. Teie ia e reva nei, teie ia, e faarue mai nei ia ratou.

O vai hoi a taata eita e mauui i te taima a reva atu ai to'na metua. Teie râ i roto i ta tatou taioraa, te horoà nei Ietu, te mau poroiraa hopeà, **E inaha na'u e tono mai ia outou nei ta taù Metua i parau maira, e parahi ra outou i te oire nei i Ierutarema, e ia noaa mai to outou itoito no nià mai. Ev. Ruta 24/49.**

Tei roto noa a oia i te aparauraa i ta'na mau pipi, te ravehia'tura oia, **E te parau noa ra oia i taua mau parau nei, e te hio noa maira ratou ia'na, rave hia-tura oia i nià. Ohipa 9 v.m.**

Tatou i teie mahana te faahiti noa nei tatou i te parau no te revaraa o Ietu e oia mau ihoa. Teie ra tamata na tatou i te hio i teie parau na roto i te huru no te Atua.

Te naò ra te tahi reo i roto i te Ev. no Ietu ia au i te hioraa a Ioane 3/16. **I aroha mai te Atua i to te ao, e tae noa i te horoà mai i ta'na tamaiti fanau tahi, ia ore ia pohe tei faaroo ia'na. I teie taima i roto i ta tatou taioraa, te rave nei te Metua i ta'na i horoà mai, te vai atoà ra to'na here, te vai atoà ra to'na mauui raa. UA OTI TE OHIPA TEI TONO HIA MAI IA'NA E TIA IHOA OIA IA HOI I TO'NA METUA RA. No reira tei parau e : rave hia tura oia i nia. Oh. 9 v.h.**

Te tahi haapiiraa no tatou i teie mahana maoti ra o te parau no te hoèraa.

Te hoèraa tei titau hia mai e te Atua.

Te hoèraa tei haapii noa hia mai te parau a te Atua.

Te hoèraa tei haapii noa hia mai e Ietu.

Te hoèraa ta Ietu e poroi nei i ta'na mau pipi hou oia a reva atu ai.

Te hoèraa ta'na e titau mai nei ia tatou i teie mahana, ia ite hia te Aroha o te Atua.

No te mea, te Fatu ta tatou e tiàturi ra, ta tatou e faarii ra, ta tatou e haamori. Te parau o Pauro i roto i te toru no ta tatou taioraa oia hoi **Firipi 2/9 : "I faateitei roa'tu ai te Atua ia'na, e ua horo'a hoi i te io'a i hau ê roa i te mau io'a atoà nei no'na.**

Te mau taeae, te mau tuahine, tatou to te paroita nei, te maa vahi iti noa teie noaa i te manaò.

Iaorana.

Hitiura orometua

PURERAA MAHANA PENETETOTE

(CIAPATI 07 NO TIUNU 1992)

TE MAU TAIORAA:

Ioane	14/ 15-23
Ohipa	02/ 1-11
<u>Roma</u>	<u>08/ 8-17</u>

E hoa here mā, ia ora na i te aroha o te Atua i teie ôroā Penetetote.

I mua i teie parau no te Penetetote, te hinaaro nei tātou e faaite haamanaò faahou i te puai no te Vārua o te Atua o tei hinaaro i te faatupu i ta na ôpuaraa. E mai te mea te fāriu nei to tātou manaò i nià i te mau òhipa o tei tupu i taua mahana ra, te ite nei ia tātou i te haamataraa no te hoê òhipa āpī.

Aita i riro noa ei òhipa maere, na roto anei i taeraa mai te Varua maitai i nià ia rātou, e aore ra na roto i to te mau pipi parauraa i te mau reo e rave rahi o tei faaroohia e te rahiraa o te mau taata i tae mai i taua mahana ra e te tahi pae rahi o rātou o tei fārii i te papetitoraa.

E parau rā teie o tei faaite i te hoê tauiraa rahi i roto i te taata o tei i i te Varua maitai. Inaha hoì i parahi noa na rātou i roto i te mataù. Mataù i te hamani-ino a te mau Ati Iuta, o tei faaite pāpū i to rātou tūāti-òre i teie taata ia Ietu e o ta rātou i tuu roa atu i nià i te raau tarava ia pohe. No te reira mataù o te mau pipi, ua parahi moèmoè noa rātou i roto i te hoê pihā no te tauā parau anei i nià i te mau parau o ta te Fatu i faaite ia rātou, no te mau òhipa anei o ta rātou i ite i to rātou parahiraa i pihai iho ia na e aore ra no tei tiaì i te parau no te taeraa mai te hoê Varua faaàò ei aratai ia rātou mai ta te Fatu iho i faaite mai.

Na roto i teie pupu taata iti haihai roa, o tei òre i haapaò i to rātou mataù no te haere e faaite i te parau āpī, i tae roa ai taua parau āpī ra i roto i te nahoà rahi, e mai roto ia rātou e tae roa atu ai i roto i te mau fenua no reira mai teie mau taata.

Oia mau aita rātou i mataù faahou i te pohe, aita i mataù i te huru o te taata o tei faau ia rātou i te taéro àva, ua tià rā i nià no te haere e faaite i te hinaaro o te Atua, no te faaite i ta na ôpuaraa faaora. E tià ia tātou ia ui i ô nei e, no hea mai teie puai i roto i te mau pipi.

Ei pahonora matamua, no roto mai ia i te mana o te Atua. O te Atua iho, na roto i to te Varua parahiraa i nià ia rātou i taua mahana ra i noaa ai ia rātou te pūai no te haere i rapae i te fare, no te haere e farerei i to rātou mau taeàè ia ite atoà rātou i te parau āpī.

Te òhipa i tupu i nià ia rātou ua riro ia mai te hoê tāpaò o tei haapāpū e te pihai iho te Atua ia rātou. Oia atoà tātou i teie

mahana, i te tahi taime te hinaaro atoà nei tātou ia haapāpū faahou mai te Atua e tei pihai iho ò ia ia tātou. I roto anei i te mau taime e parahi ai tātou i roto i te mataù, i te mau taime e paruparu ai to tātou faaroo.

Te piti o te manaò, no to rātou ia faaroo. Faaroo i te mea, ua ite rātou e, eita ta rātou òhipa e manuia ia òre rātou e vaiho ia rātou ia arataihia e te Atua. Te vai nei teie tūàtiraa i roto ia rātou e to rātou Fatu. Ore noa atu ai to rātou mata e ite ia na, òre noa atu ai to rātou tarià e faaroo i ta na mau parau. Te mau parau rā o tei vaihohia mai ia rātou, ua riro noa ei parau tei tūrai ia rātou i roto i te hoê tiàturiraa āpī. Eiaha i raro aè faahou i te faatītīraa a te ture, ua riro rā rātou mai te mau taata o tei ite i te ora, tei fārii i to rātou faatiāmāraahia i mua i te parau no te hara. faatiāmāhia na roto i te pohe o to rātou Fatu. Te ora nei rātou i teie nei ia au i ta te Vārua, mā te ite e, e tamarii atoà rātou na te Atua. E no teie oraraa āpī ua noaa ia rātou te pūai hau e no te faaite i te parau a te Atua.


O ta Pauro atoà ia e hinaaro nei ia haamanaò faahou te Etaretia i to Roma, na roto i teie parau, " o te feiā atoà hoī ia arataihia e te Vārua o te Atua ra, e tamarii anaè ia rātou na te Atua " (Rom8/ 14). Ia haamanaò rātou i te maitai o te Atua o tei horoà mai i te raveà e tae ai rātou e tātou atoà nei i roto i te ora. Teie raveà ua horoàhia i te mau taata atoà.

Aita atu ra te parau no te haafatataraa i te Atua i riro faahou mai te hoê parau o tei aratai ia tātou i roto i te faatītīraa a te ture hou a tae atu ai i te ora o ta na i hinaaro no tātou. I te mea e, ò ia iho tei haafatata mai na roto i ta na tamaiti.

Te toru o te manaò, te faaite nei rātou i te hoê parau o te faatupu i te òaòà i roto i te taata tei fārii. E parau òaòà ta rātou e faaite nei, e ère rā i te parau peàpeà e o te faatupu i te mataù i roto i te taata mai tei matau noa hia.

I teie mahana, e tià ia tātou ia ui, e aha te huru no ta tātou faaiteraa. E aha o ta na e faatupu nei. Te faaite anei i te parau òaòà. Te iriti anei i te taata mai roto mai i te mataù e nehenehe atu ia rātou ia ora i to rātou faaoraahia e te Fatu. Teie rā e ara tātou ia òre te faaite raa ia riro mai te hoê parau faatiani. Ua rau atoà te mau faaiteraa i teie mahana o te poro atoà nei i te hoê oraraa òaòà. Teie rā, ua ite pāpū tātou i te hopeàraa. Te tahi pae te faaite nei ia te reira na roto i te haamataùraa i te taata.

Ei poroiraa no tātou i teie mahana Penetetote, eiaha e mataù e haere rā e faaite i te parau òaòà eiaha i roto noa ia tātou iho, e haere e farerei i tei faaea noa i rapae mai i te āua. Mā te haamanaò atoà e tei pihai iho te Atua ia tātou, ei ia na e manuia ai ta tātou faaiteraa. E faaite i te parau o tei iriti i te taata i te riarià e tāamuamu ra ia na. Ia maitai òutou i teie Penetetote.



VEA OROMETUA

Episetole papaihia ei faaitoitoraa
e ei taamuraa i te mau tavini o te Atua
tonohia e te Ekalesia

205
N°39
1993

24 MAI 1993

Paōfai, i te 24 no Mati 1993.

REÇU LE
29 AVR. 2002

*I te mau taeae òrometua e tauturu orometua
o te Etāretia Evāneria,*

Ia ora na outou i te aroha faito-ore o to tātou Fatu o Ietu Metia i to tātou fārereiraa na roto i te raveà o teie nei veà-orometua.

*E hoa here mā e, te ineine atu nei tātou i te tomo i roto i te pārau no te **Hepetoma-Moà**, te **Revaraa** e te **Penetetote** o tei faahāmanaò mai ia tātou i te mau ohipa taaē o ta te Atua i faatupu i te ao nei na roto i ta na Tamaiti otahi ia Ietu-Metia.*

No reira, ei tautururaa ia outou i te pae no te mau poroïraa (faaitoitoraa), ua faaineine mai â te tahi pupu iti taeae òrometua, o ta tātou e haamauruuru maitai nei, i te hoê mau hohoà poroïraa o te tià roa ia outou iho i te faaravaì.

Te faahaamanaòhia atu nei ïa outou e, e faatiàhia te Oroà Euhari i te:

- **Tāpāti no te mau Amaa**, 4 no eperera 1993
- **Faraite-Moà**, mahana pae 9 no eperera 1993
- **Tāpāti Tiafaahouraa**, 11 no eperera 1993
- **Revaraa**, mahana maha 20 no me 1993
- **Penetetote**, tapati 30 no me 1993.

* I te Faraite-Moà (mahana pae 9 no eperera), e haamata te pureraa i te hora 8 i te poipoi e e faaoti i te hora 2 i te avatea, na roto i te oroà Euhari

E toru tuhaa i roto i taua pureraa ra :

- 1- te parau no te Faraite-Moà
- 2- Te haapaeraa maa e te pure
- 3- te faatiàraa i te Oroà a te Fatu.

A rave e a ora papū tātou i te parau no taua mahana ra ia au i te mau pahonora a i faataahia i roto i ta tātou papa-haamori


Eiaha atoà ia aramoinahia ia outou e, i te mau ahiahi atoa no taua Hepetoma-Moà ra, e pureraa ia to tatou i roto i te paroita.

Ia riro atoà ia taua mau oroà ra o ta tatou e tomo atu nei ei taima e tià atoà ai ia tatou ia faahanahana i te Fatu no te rai o tei heheu mai ia tātou i to na aroha otià-ore na roto i tana Tamaiti fanau tahi ia Ietu Metia o ta na faatia-faahou mai mai te pohe mai

Ia haamaitai mai te Atua ia outou paatoa !

I te ioà o te Apooraa Faatere,

Te Peretenti,


PRÉSIDENT

Jacques IHOKAI

TAPATI NO TE MAU AMAA (Tapati 4 no Eperera 1993)

Taioraa : Itaia 50/5 - 11
Mataio 21/1-11

Irava tumu : Mataio 21/10.

***"E tae atura oia i roto i IERUTAREMA,
aueue ihora taua oire atoa ra, e te taata
atoà i te uiraa e, O vai teie ?***

To te huifaaroo nei, teie ā tātou e faaineine nei i te tomo i roto i te hoê tuhaa faufaa roa no te aai no te ora raa o Ietu i roto i teie nei ao maori rā te parau no te hepetoma moà. No te aha hoì i parau hia ai te hepetoma moà ?

Teie ia, i roto i te roa raa hoê hepetoma te maoro e farerei ai Ietu te mau ati e rave rahi e taua mau ati ra o te aratai ia na i nià i te pohe tatauro e to na atoà tiāfaahouraa i te tāpati no te Pāta. Na te aha rā e ômua i taua hepetoma moà ra ? E parau tātou, na te òhipa ia ò ta tātou e faahaamanaò i teie tāpati oia hoì te parau no to Ietu tomo raa i Ierutarema. E parau faufaa atoà teie ia tātou ia ìte no te mea, āhiri aita teie tomo raa no na i Ierutarema, i hea ia e tupu ai te mau parau atoà i parauhia e te mau perofeta no te Faufaa Tahito ? E nahea atoà ia e tupu ai te ôpuaraa a te Atua no te haaparare i to na patireia, haamata atu na Ierutarema e tae noa atu i te hopeà o to teie nei ao ? E no reira, ei faatupu raa i te mau mea atoa e tiaì, te faahope nei Ietu i ta na òhipa e to na atoà ora raa i roto i te òire no Ierutarema. E aha te huru no taua tomo raa no na ra i Ierutarema ? Ia au i te Ioane pene 11 irava 57, ua poro te mau tahuà rarahi e te mau fāritea i te mau taata atoà o te ìte noa atu ia Ietu, ia haru ia na e ia arataihia oia i mua i te tuneteri, mai te mea atura ia e taata ôrure hau riāriā roa teie (hors-la-loi), eita atoa e òre, ua faaineine atoàhia te tahi tino moni huru rahi no te taata

noa atu e haru ia Ietu. Mai te mea rā, ia hiòhia, e mau òhipa ìno roa ta Ietu i rave i roto i to na ora raa e tiaì ia na ia haruhia. Te parau pāpū rā, ua parare aè na te roo o Ietu na te fenua Paretetina e tae roa mai i teie taima a faaineine ai oia i to na tere i Ierutarema.

I te pae no Ietu iho, ua ìte maitaì oia i te ôpua raa ìno e rave hia i nià ia na ! E no reira, no taua ôpuaraa na na ra e haere i Ierutarema, e nehenehe noa ia na ia tapunipuni ia òre oia ia ìtehia e te taata. E nehenehe noa ia na ia haamoèmoè no te tomo raa atu i roto i te òire. Aita rā oia i na reira. No te faatupu raa i te mau parau tohu atoà, i hinaaro ai oia i te haere i Ierutarema na nià i te eà no te maramarama eiaha rā na roto i te pòiri, eiaha atoà na roto i te raveà tapuni. Na vai e haapāpū mai ia tātou i teie manaò no Ietu ? Na te òhipa ihoā ia ta na i rave maori rā to na faaineine maite raa i taua tere no na ra. To na faaueraa i na pipi toopiti no te haere e tii i te àtini tei apitihia e to na fanauà ia au i te ìrava 2 no ta tātou nei taiòraa, ua tupu mau ā mai ta na i hinaaro no te mea ua faaineine ātea hia teie tere to na. E no reira, eere roa ia na teie nei mau ôpua raa ìno a te mau tahuà rarahi e te mau fāritea e faahuruê e tau i to na tere i Ierutarema. Aita Ietu i mataù i te mau poro raa parau riàrià tei faahiti hia no na.

I te pae no te mau Pipi a Ietu, e nehenehe atoà ia rātou ia tāparuparu i to rātou Fatu eiaha e haere i Ierutarema ia tau i rā te vāhi no te mea te ôpuahia ra o ia i te tahi ôpuaraa ìno. Aita rā rātou i na reira. Ua ìte atoà rātou i te ôpua raa a to rātou Fatu i òre ai rātou i hinaaro i te faahuru ê i te tere o Ietu. Te òhipa rā ta rātou i rave i muri aè i te aratairaa hia mai te àtini, ua vauvau vêtahi o rātou i to rātou ahu i nià i te àtini no te faaiteraa i to rātou manaò faatura i to rātou Fatu e te manaò àpiti raa atu ia na i roto i to na tere.

I te pae no te nahoa rahi, i te taima a tomo ai Ietu i Ierutarema, e nehenehe noa ia rātou ia haru ia Ietu no te mea ua faaroo rātou i te mau parau tei porohia no na. E nehenehe noa ia rātou ia pēhī ia Ietu i te ôfaì e aore ia e arataì ia na i mua i te mau tahuà rarahi. Aita roa atura rātou i na reira ! Eaha rā te òhipa ta

rātou i rave ? Teie ia, te vauvauraa ia i te mau âmaa raau i nià i te êà mā te faahotana ia na. Ua fārii rātou ia Ietu i te tomoraa i Ierutarema e inaha no taua huru ra, i tupu ai te parau no ta tātou nei irava tei na ô mai e,

" ... aueue ihora taua òire atoà ra, e te taata atoà i te uiraa e, o vai teie ... "

E hoa here mā, eita paha e òre teie feiā i uiui e, o vai teie, te mau taata paha tei òre i faarooroo noa atu i te parau no Ietu e aore ia te feia i òre i faaroo i te mau pororaa parau no nià ia Ietu. Te parau pāpū rā, maori rā ia te parau no to Ietu tomoraa i Ierutarema ua faatupu ia i te tahi mau ârepurepuraa i roto i te aau o te taata. E òhipa rahi tei tupu i Ierutarema i taua mahana ra. E òhipa paha tei òre aè nei i tupu i nià i te hoê taata e aore ia i te hoê Arii tei tomo i Ierutarema. E fāriiraa poupou rahi ta te nahoà rahi ia Ietu i to na tere i Ierutarema, e riro atoà e e farerei raa hopeà mai teie te huru no Ietu e te mau taata i Ierutarema.

Aita rātou i pii ia Ietu mai te hoê taata ôrure hau no te mea ua ite ratou i roto ia Ietu te hohoà no te hoê tei haere mai e âfai i te hau, tei haere mai na nià i te àtini, hohoà te reira no te haehaa.

"... o vai hoì teie ?"

Te pahono raa i te feia i uiui maere, o te irava 11 no ta tātou taiòraa a Mataio,

" o Ietu teie, te perofeta o Natareta i Tarirea ra".

Eita paha e òre, o taua feia uiui maere atoà o te haapuai i to rātou reo i te taima e faatataurohia ai o Ietu. Teie rā, mai te peu e aita e òhipa ìno i tupu i nià ia Ietu i to na tomoraa i Ierutarema, ua riro rā taua tere no na ra ei haamataraa e aore ia ei ômua raa no te mau ohipa riàrià o te tupu i nià ia Ietu i roto i te roaraa no teie hepetoma o ta tātou e haere atu nei

"... o vai teie ?"

E hoa here mā, i teie tāpati haamanaòraa i to Ietu tomo raa i Ierutarema, teihea roa ta tātou mau âmaa raa ia nehenehe ia tātou ia tahirihiri ? Na roto i taua huru, e nehenehe atoà te feiā e hahaere noa na nià i te purumu ia uiui maere

"Eaha ra hoi te ra'e i roto i terā Paroita ? No vai râ ia ratou i mau rima ai te mau amaa raa ?"

Ahiri tātou e na reira ra, te reira taata ta na amaa raa, te faaite pāpū ra ia tātou i te parau no to tātou Fatu i mua i te aro o to te ao nei ei iritiraa i te parau no te hepetoma moà o ta tātou ā e haapaò i teie matahiti 1993.

Ia maitai òutou i teie nei tāpati no te mau âmaa.

AMENE.

TAUIRA Marama
orometua.

FAAITOITORAA NO TE MONIRE 5 NO EPERERA 1993Taioraa pipiria Ruta 22/63-71

E hoa here mā, na roto i ta Ruta faaìteraa, te ô nei tātou i roto i te hepetoma no te mau :

faainoraa
faahaparaa
tāhitohitoraa
te mau àti
te mau mauui
te poheraa no Ietu-Metia.

E hepetoma no to Ietu faaòromai maiteraa i te ino e te hara a te taata nei e, ua tae roa i te pohe tatauro.

I te ropūraa o te pō (ua mairi te hora 12). Te tupuraa te parau no to Ietu tapeàraahia.

E mea huru ravai teie parau aroha i roto ia Ruta e ia Mataio ; e ta Ietu parau ia Iuta, i reira to na pūpūraa ia na iho i te rima o to na mau nemi, ia tupu tei papaihia ; e te faatià nei o ia, ia ruuruuhia o ia (Ioane 18/ 12).

Taramo 118/ 27-28 : ... a ruuruu na i te tutia àmu i te taura i nià i te mau tara o te fata nei, o ta ù Atua òe, e haamaitai ā vau ia òe, o ta ù Atua òe, e faateitei a vau ia òe.

To te mau ènemi hinaaro : ia pohe roa o ia i te utuà-tatauro.

a) Te arataihia nei o ia na mua i ô Ana Tahuà rahi, e metua hoo vai no Taiafa, peretetini na roto i na matahiti e rave rahi i te âpooraa rahi ati-Iuta tei parauhia te "Tuneteri" e 70 mero.

e) Mai reira arataihia atura ia Taiafa (te hunoà no Ana). I reira to te mata mauui e te aroha rahi no Ietu tano raa i nià ia Petero, e to Petero òto raa i te òto tatarahapa.

Aita te tahuà rahi i haamarirau ua faaòtihia te parau no Ietu mai te tiaì i te hoè apooraa piti o te ravehia ia poipoì aè.

f) irava 66 : E tei te ao raa ra... oia hoì i te poipoì roa ua putuputu faahou to te tuneteri, e aita e faaotiraa pāpū i ravehia no te mea aita te tahi mau manaò i tuàti, no te mea te mau ìte i faarohia. Te hoè mero no te tuneteri tei ore i tuàti i te vetahi mau manaò (Ruta 23/ 50-51) : E inaha, te hoè àuvaha parau no Arimataio, o IOTEFA te iòā, e taata maitai e te parautià, aita o ia i faatià i te parau a te tahi pae, e ta rātou i rave ra, te tiaì atoà ra oia i te patireia o te Atua.

irava 70 : te ui nei to te Tuneteri ia Ietu, O te Tamaiti maori oe na te Atua ? Ua na ô atura o ia, E parau mau ta òutou e parau na, o vau ia.

Ua na ô ihora rātou : Eaha atu ā hoì to tātou ite, inaha, ua parau roa mai o ia ia tātou.

I mua i te mau parau no to Ietu haavaraahia, i mua i te mau haavīraa i ravehia i nià iho ia na e te vai atura, te uiui nei te manaò : Aita ānei teie mau peu e rave atoāhia nei i teie tau ? Aita ānei e mau haavīraa e ravehia nei e te feia puai i nià i te feia riiri, ravaì-òre, rāveà-òre ?

Mai te peu e, te na reirahia nei, e aha ia to òe manaò to te nūnaa faaroo ?

No Ietu, ua haapaò mau hia e te Atua. E no tātou i teie tau, e mea haapaò mau hia ānei e te Atua ? E hoa here e, tei ia òe rā paha te pahonora. (Hoê hoì o Ietu-Metia huru, i nanahi, i teie mahana e amuri noa atu. (Hepera 13/8).

FAAITOITORAA NO TE MAHANA PITI
6 NO EPERERA 1993

O TE ARII MAORI OE O TE ATI IUTA ?

Taiòraa : Ruta 23/ 1-12
Faaitoitōraa : Ruta 23/ 3vm

E hoa here mā, tātou e faaroo mai nei i teie taiòraa no teie ahiahi. Ia ora na âmui tātou i roto i te Aroha o te Atua.

Aroharaa...

Ta tātou irava no teie ârui te na ô ra ia e : **"O te Arii oe o te Ati-Iuta ?"** Mai te mea ua faaroo maitai tātou i ta tātou taiòraa.

Te taa pāpū ra ia tātou e, no Pirato teie reo, te tavana rahi no roto mai i te hau Roma tei riro ei tavana i roto i te fenua Iteraera i te tau no Ietu.

E nehenehe tātou ia ui e : **"No te aha teie huru uiraa ?"**

Te pahono ra te mau irava matamua e : mea arataihia mai Ietu i mua ia Pirato e te Tahuà rahi no Ierutarema oia hoì te mana faatere o te Faaroo Ati-Iuta, mā te faahapa atu ia na e. E taata òrure hau : **"Ua ìte aè nei mātou ia na i te haapiòraa i teie fenua, e te faaòre raa i te taoà àufau na Taitara e te parau ia na iho e, o te Arii rā o ia te Metia"** Ruta 23/ 2.

I roto ia te uiuiraa a Pirato, aita o ia e ìte nei i te hapa o Ietu. E no te mea e taata Tarirea o Ietu e no te mea hoì e, te faatere fenua i taua mau paeo Herota ia, i tononatura o ia ia Ietu i mua i to na aro e nana e haapaò i taua òhipa ra. Oaoa rahi to Pirato te ìteraa mai ia Ietu e no te mea te vai nei te tahi mau hinaaro to na ia Ietu o ia hoì te faatupuraa ia i te tahi temeio.

E no te mea aita Ietu i pahono i ta na mau uiuiraa e i pihai iho ia na i taua taimera, te vai nei te mau tahuà rahi e te mau papai parau : **"faahapa maira rātou ia Ietu e ma te faaoo atoà"** irava 10-11. Te òhipa maere ra i itehia i te pae hopeà ; o te hoaraa ia o Pirato raua o Herota inaha hoì i vai enemi noa na raua. Haapāpūhia te reira i te irava 12.

Iritihia to tātou pureraa no te hepetoma moà i te tāpati ra i teie mahana o te toru ia o te mahana. I haava hia na Ietu i mua i te

tuneteri, i teie âruì tei mua ia i te hau poritita. Te tahi òhipa pāpū maitāi e ìte hia. To teie ia mau taata to teie mau tiā faaroo, to teie mau tiā poritita imiraa i te mau rāveà atoà no te faahapa ia Ietu. I muri mai i taua faahaparaa te vai nei to rātou hinaaroo tei òre i tiāhia. To te pae faroo no taua tau ra. Te òre raa Ia Ietu e faatura i ta ratou mau faanahoraa. To te pae poritita : te òre raa ia ei faatupu hia to raua hinaaro.

Ua tuāti te mau tiā faaroo no te faahapa ia Ietu inaha hoì e ere rātou i te mea afaro roa rātou rātou iho. Te tātutea e te mau faritea e te vai atu.

Ua tūāti te mau tiā poritita no te faahapa ia Ietu inaha hoì e mea ènemi roa te tahi i te tahi oia hoì o Pirato e o Herota.

No reira a ara ia tātou ia faatatauro faahou i te tahi Ietu āpī no to tātou au òre ia na, no te mea aita o ia e tūāti mai nei i to tātou mau manaò. Ia riro teie òhipa i tupu i roto i ta tātou parau no teie ahiahi ei hiòraa na tātou.

Ia ora na.

HITIURA orometua.

FAAITOITORAA NO TE MAHANA TORU
7 NO EPERERA 1993

TAIORAA: RUTA EV 23/13-25

Irava faaitoitoraa 18:

"Ua pii tahi atura rātou atoà: E faaruè atu i tena, o Parapa ta `oe e tuu mai."

E te mau taeaè e te mau tuahine,

Ia ora na tātou i te Aroha o te Atua i teie hepetoma moà.

Te parau tei horoà hia mai na tātou i teie mahana e te papai evaneria ra o Ruta, e parau ia no to Ietu arataïraa hia i mua i te tià o te Hau Roma ia Pirato. Na roto i te mau raveà tià òre tei faaòhipa hia e te mau faatere faaroo i te pari haavareraa ia Ietu i te mau ìno atoà, ua tae roa rātou i te arataïraa ia na i mua ia Herota e ia Pirato. Ua tiāturi teie mau faatere faaroo e rave o Herota e o Pirato i tahi faautuàraa ia Ietu no teie mau pariraa ta rātou.

Ia tae Ietu i mua ia Herota, ua parau o Herota i te tahi mau parau i nià ia Ietu. Aita o Ietu i pahono rii aè. Ua faahoì atura òia ia Ietu ia Pirato ra. I roto i ta tātou taiòraa, o te pitiraa o te taimè no to Pirato farereïraa ia Ietu, ua pāpū o na e aita ta Ietu e hara. Eita o Herota e o Pirato e rave i te faaòtiraa no te haapohe ia Ietu noa atu teie rahiraa pariraa a te mau papai parau e te mau tahuà. I roto i te hiòraa a Pirato, e tuu o ia ia Ietu no te mea aita ta na e hara. Teie ra te reo o te nunaa e to te mau faatere faaroo ia Pirato i te piïraa e: *"E faaruè atu òe i tena, o Parapa ta òe e tuu mai"*.

I roto i te tahi huriraa no teie piïraa ta rātou ia Pirato, teie te roaa mai: *"E haapohe atu i tena, o Parapa ta òe e tuu mai"*.

Ua maraa i teie mau taata i te parau ātu ia Pirato i teie huru parau. Te ani rā rātou e ia haapohe hia o Ietu, o Parapa ra te taata òrure hau e te taparahi taata ia tuuhia òia. E ua upootià teie reo tei ani e ia haapohe hia o Ietu, e ia faatiāmā hia o Parapa. Ua manuia te òpuaraa ìno a te mau faatere faaroo e haapohe ia Ietu. Ua faaòhipa hia te nunaa i roto i teie òpuaraa ìno. E mea hairiïri mau te mau raveà tei faaòhipa hia e te mau faatere faaroo.

Teie mau ta tātou raverāa i te Tamaiti a te Atua. E haapohe te Maitai, ia ūpootià te Ino. E faaòre te Aroha, ia rahi te Hae. E tapu te Here, ia tupu noa te Feiï. Ua manuia te Tiàporo na roto i te taata.

I roto i te parau o ta tātou e hiò nei, ua faaòhipa te Tiaporo i te feia faaroo. Te mau papaì parau e te mau tahuà, e mau taata faaroo teie i te tau o Ietu. To rātou riri ia Ietu, aita i haere i te ìti. I tae roa ai rātou i nià i teie òpuaraa ìno ta rātou i te ìmiraa i te mau raveà atoà e ia haapohe hia o Ietu. Te taata tei raro aè i te mana o te Tiaporo, èita o ia e taa faàhou i te òhipa o ta na e rave ra. Te reira mau te òhipa tei tupu i nià i te mau faatere faaroo. e te nunaà. Ua ani rātou ia Pirato e ia tuu hia o Parapa te taata taparahi taata. E haapohe ra te taata hara òre o Ietu. Aita e āniraa maamaa mai teie te huru.

Ta tātou parau no teie mahana, te faaite noa mai ra òia ia tātou i te rahiraa hamani ìno i ora hia mai e to tātou Fatu. Te faaite atoà mai ra ta tātou parau i to tātou huru to te taata i mua i te Fatu. Mai tei tupu i nià i to tātou Fatu, e hamani ìno atoà hia te taata no te Evaneria. E hamani ìno atoà hia te taata tei faaite i te hinaaro o te Atua Te peeraa ia Ietu eere i te mea òhie, e farerei atoà i te àti. Te taata te faaite i te parau-tià, èita òre òia i te haàfifi hia.

I nià i te parau no to tātou huru to te taata, te faaāra mai ra ta tātou parau ia tātou, e tià roa i te Tiaporo i te faaòhipa ia tātou no te àro i ta te Atua. Te feia faaroo i te tau o Ietu, ua hamani ìno rātou i te Ora a te Atua. E mea maitai atoà tātou e hiò e aita anei tātou e riro atoà ra ei mau taata tei àro i ta te Atua aōre ra tei hamani ìno i te mau horoà a te Atua.

IA ORA NA

FAAITOITORAA NO TE MAHANA MAA
(10 NO EPERERA 1993)

RUTA : 23/50-56

E hoa here mā,

I nanahi nei, ua ora mai na tātou i roto i te "Faraite Moà" e i roto i te parau no to te Tamaiti a te Atua faatatauroraahia. E ua ìte mai tātou i te mau òhipa atoà i tupu i taua mahana ra i Ierutarema.

Ua hinaaro rā vau e tapeà mai i te tahi mau òhipa o tei tupu i taua mahana ra no te arataì ia tātou i roto i te feruriraa i ta tātou parau no teie mahana (no teie ahiahi) ?

* E nahoa rahi taata tei tae atu i te vāhi i faatataurohia ai o Ietu e tae noa atu i na taata rave hara. E rave rahi tei tāhitohito mai ia na ma te parau e : "ua faaora o ia ia vetahi ê, a faaora o ia ia na iho."

* Ua faaroo atoà hia o ia i te tauà parauraa i na taata rave hara inià i te tatauro.

* E ia fatata i te taima no to na poheraa, ua ìtehia te tahi mau ohipa e te tahi mau tapaò maere rahi i te tupuraa ;

- te pouri i nià i te fenua,
- te haapouriraahia te mahana,
- te paruru o te hiero i te mahaeraa na rōpū.

* E mai rotopū mai i teie mau òhipa atoà i tupu i taua mahana ra, to tātou faarooraa i te reo o te Fatu mai nià mai i te tatauro i te na ô raa e "E ta ù Metua, te tuu atu nei au i ta ù Varua i to rima na", pohe ihora o ia.

* Ua faaroo atoà hia te reo o te raatira hanere Roma i te haamaitairaa i te Atua e te na ô raa e : "E taata parau tià mau ā teie."

* E i muri aè i te òhipa rahi riàrià i tupu i taua mahana ra, ua purara ê atura te nahoà rahi taata mā te pāpai i to rātou ôuma no te mauui o te àau e te teimaha hoì no te òhipa o ta rātou i ite aè nei.

Areà to na mau hoa e te mau vahine tei matau roa i te pee ia na, tei te atea ê ia i te hiòraa mai.

Teie, e hoa here ma, ia haapotohia, te mau òhipa atoà i tupu i taua mahana ra, ia au i te faatiàraa a Ruta, e hou tātou a tae mai ai i roto i ta tātou parau no teie ahiahi.

Te parau rahi e vai nei i roto i teie tau puè irava 50-56 no te Evaneria a Ruta i te pene 23, o te parau ia no te hunaraahia i te tino pohe o Ietu i teie taima taperaa mahana no teie nei mahana hou te tāpati Ati-Iuta.

Na Evaneria atoà too mahana teie e haapāpā nei e, o Iotefa Arimataio te taata tei haapaò i te òroà hunaraa o Ietu. E ia au i te faaàteraa a Ruta, e taata maitai teie e te parau-tià. E mero atoà o ia no te Tuneteri, teie ra, mai ta Ruta e haapāpū atoà ra, aita o ia i âmui atu e i turu atu i te faaotiraa a te Tuneteri e faatatauro i te Fatu. E taata ra o ia tei tiaì atoà i te hau o te Atua.

I muri aè i to Ietu faaruèraa mai, ua haere atura Iotefa Arimataio e ani ia Pirato i te tino o Ietu, ia au mai ta te ture Roma e titau ra.

Ua tii atura o ia i te tino, tuu ihora i raro, pūòhu ihora i roto i te ahu e tuu atura i roto i te menema âpi i paohia i roto i te mato, n, o te mea, ia au i te faanahoraa i roto i te faaroo Ati-Iuta, e òre e au ia vaihohia te hoê tino pohe i nià i te tatauro i te mahana tāpati, inaha hoi, ua tapetape roa te ra e ua fatata roa mai te tāpati.

No reira, te mea o ta tātou e ite nei i ô nei, o te rū noa raa hia ia te òroà hunaraa o te Fatu, no te mea, e òre e tià i te Ati-Iuta ia rave i te òhipa i te mahana tāpati. E nehenehe atoà ia parauhia e, aore roa

e òhipa i ineine no to na oroà hunaraa. I te mea, ia ìte mau faanahora ai roto i te peu Ati-Iuta, e tuuhia te mau raau noànoà i nià i te tino pohe hou te tino a tuuhia atu ai i roto i te menema.

Eita ra e òre e, o te hinaaro atoà teie o te Fatu, eiaha to na tino ia mirihia i te raau noànoà, i te mea, eita o ia e parahi noa i roto i te menema, ua riro ra to na tere i reira, ei tere poto noa, no te vaiho atu i to na tino tahito, tei teimaha i te ino e te hara a te taata e a to te ao, e no te ahu mai i to na tino àpi, tino no te tiaitururaa ora, no te here, te aroha e te tiàfaahouraa, o tei ìriti i mua i to te ao e i mua ia tātou i te ùputa no te ora mure òre.

Ua ineine ānei tātou no te tomo na teie ùputa ? Aita ānei hoi tātou i roto mai teie mau taata tei òre i ineine e tei òre i faaineine i te òroà hunaraa o Ietu ?

Tātou e hinaaro nei e tomo na teie ùputa, e mea titauhia tātou ia vaiho atoà i to tātou tino tahito, tino feii te tahi i te tahi, tino faaino te tahi i te tahi, tino pohehae te tahi i te tahi, au òre te tahi i te tahi, e òre te reira huru o tātou e o na teie ùputa, e àhu ra i te tino àpī, tino no te here e te aroha, ia au mai ta te Fatu iho i parau, "**ia here òutou te tahi i te tahi, ua riro ia òutou ei pipi na ù i reira.**" Eiaha e tiàturi noa ei nià i to tātou mau tiàraa, òrometua anei, e tiàtono, e poro evaneria, peretiteni no te hoê àmaa ohipa etv... e mau tiàraa anaè te reira tei ùme e tei aratai ia tātou i te faaòhipa i te mana taata e te mana o to te ao. O te aroha anaè ra e aita atu, o te ìriti i mua ia tatou i te ùputa no te ora mure òre.

No reira e hoa here mā, a faaòhipa anaè i te aroha ia faufaahia te tiàfaahouraa o te Fatu i roto ia tātou, e o ta tātou e haamanaò faahou ananahi

Iaorana.

TAPU Thierry.

TE TIÀFAAHOURAA

Taiòraa: Ruta 24/ 1-12

“E aha òutou i ìmi ai i tei ora i te vairaa o te pohe pohe”

Aroharaa:

E hoa ino mā, ia ora na i te aroha o te Atua i teie mahana òaòà rahi no te hui faaroo.

Te òpani nei tātou i teie poipoi i te hepetoma moà na roto i te tiàfaahouraa o to tātou Fatu.

E aha te auraa no teie parau i teie mahana.

Eita e òre i roto i te feruriraa o te taata, ua tupu teie òhipa a 2 000 matahiti i teie nei, e no te reira tumu ua moèhia ia rātou te auraa hohonu no teie parau, e aore ra te puai o ta na e horoà nei ia tātou.

Te tahi atoà tumu, i te mea ia e, a 2 000 matahiti atoà to te mau taata teretitano tiairaa i te hoìraa mai o to rātou Fatu. E aita i hoì mai mai ta rātou e manaò ra. Teie rā, aita te huru o te oraraa e te tiàturiraa i faaea noa mai tei ìtehia i te reira tau, ua tau i rā e eita e faaea i te tau. Ua tae atoà te feruriraa o te taata i te tiàturi noaraa i to na ìt e e to na àravehi. Ei hiòraa, eita te taata e ora noa i te Atua i te taata rā. Na reira atoà hoì i te òhipa rarahi o te hāmanihia nei i teie tau.

Aita te faaroo e riro faahou nei ei aveià no te aratairaa i te taata i roto i to na oraraa. O ta na iho rā mau rāveà o tei riro ei aratai ia na. Aita atoà te reira i riro faahou ei manaònaòraa na te nūnaa, ua riro rā i teie nei ei manaòanaòraa na te taata tātai-tahi.

E mea rahi atu ā te mau hiòpoàraa o te tià ia hiòhia i roto i to tātou nūnaa i teie mahana. O te tià rā ia parauhia, ua pararī atoà te feruriraa o te maru-metia i teie mahana. I te mea atoà e ère atu ra hoè noa reo o ta na e faaroo nei, ua rahi te huru o te reo e faaroohia nei. I te tahi taime, e mea navenave aè te mau reo êê. O tei haafifi i ta tātou faaiteraa.

E aha ia te huru ia faaite tātou i te parau no te tiàfaahouraa i mua i te taata. I naha hoì ua riro teie parau

ei mea fifi i roto i te maramaramaraa e te tiàturiraa o te taata.

Eita paha e òre tātou i te faaauhia i te feiā maamaa.

Ia hiò tātou i te taiòraa no teie mahana, te ite atoà nei tātou i te reira huru i roto i te mau pipi, i to rātou faarooraa i te mau faaìteraa a te mau vahine. Aita roa rātou i tiàturi noa aè i ta rātou mau parau. A tahi no te mea e vahine teie e parau mai nei, e a piti, ua ite mau rātou i to rātou Fatu i te poheraa i nià i te tatauro. Ua pāpū ia rātou e ua tuuhia i roto i te menema e a toru mahana i teie nei. Te tere o teie mau vahine no te haere ia e faahope i te mau òhipa e titauhia nio te hoè hunaraa mai. Oia hoì e afaì i te mau raa faanoànoà.

Ia hiò tātou i te huru o te mau pipi, ua moè to rātou tiàturiraa, noa atu te fatata o to rātou oraraa i pihai iho i to rātou Fatu, te mau òhipa o ta rātou i ite e te mau parau o tei faaìtehia ia rātou e o ta rātou hoì i faaroo. Ua pūai aè to rātou hiòraa i to rātou Fatu i pohe i te tiàturi i te parau no to na tiàfaahouraa o tei faaìtehia ia rātou.

I taua poipoì ra, o tei riro mai te mahana mātāmua no te hoè tau āpī tei ìritihia na roto i teie parau āpī òaòà , ua tià faahou te Fatu, ua itehia te paari o te Atua na roto i to na faataaraa i te mau vahine ei veà mātāmua, e te paruparu o te taata i roto i to na tiàturiraa, e te ètaèta. o to na àau i te fārii òhie noa i te òhipa maere a te Atua.

E noa atu te reira huru paruparu e te ètaèta o to tātou àau, aita te òhipa a te Atua i faaea, ua tupu rā i te rahi.

I roto i te menema te ìmi nei te mau vahine i te tino o to rātou Fatu. E ia fā mai te mau merahi i mua ia rātou, te hiò nei to rātou i raro. I te vāhi te reira te pohe. Te haapāpū nei rā te mau merahi, ua hope taua te reira tau. E hiò rā i teie nei i te ora no tei tiàfaahou.

Aita rātou i faaea noa, ua haere rā e faaite i te mau taeaè. Noa atu ua ite rātou i te paari o te manaò o teie mau tāne i mua i ta rātou faaìteraa. Ua riro rā rātou i teie nei ā mai te mau taata tei tiàfaahou, tei faatiāhia i roto i to rātou paruparu. Aita e mea e tāpeà faahou ia rātou, te mea faufaa i teie nei teie ia, ia tae te parau āpī i roto i te mau taeaè.

E aha te huru te tiàfaahouraa i teie mahana.

Eere ānei i te tahi òhipa o tei tupu a 2 000 matahiti i teie nei e aita atoà tātou i taa faahou i te auraa. Mai te mea te reira, e aha ia to tātou manaò i nià i te Atua ora o ta tātou e haamori nei.

Aita ānei hoì tātou e faaea noa nei mai teie mau pipi o tei òre e hinaaro e tiàturi i te faaiteraa a te mau vahine. Aita ānei hoì tātou i roto noa i te tiàraa i ravehia e rātou. Oia hoì i te tahi manaònaòraa i te parau no te tahi taata o tei pohe i te hoè mahana, aita rā i taa faahou i te mahana e hoì mai o ia.

E aore ra aita ānei hoì tātou i haere mai i teie poipoi no te hiò i te hoè taata pohe. Ma te âfaì atoà mai i ta tātou mau raau faanoànoà ei faahope roaraa i te hunaraa i to tātou Fatu.

Te mea faufaa i roto i to tātou oraraa ia au i to tātou tiàraa taata faaroo, eere ia i te hiò noa raa i te tiàfaahouraa mai te òhipa o tei tupu i te hoè mahana, o te tuuraa rā i te tiàfaahouraa i roto i ta tātou òhipa e ta tātou faaiteraa e Fatu ora ta tātou e tāvini nei.

Ua tià faahou to tātou Fatu e i teie mahana te ora nei o ia e tātou atoà i roto i teie nei ao. Te haapāpūraa i teie huru no te Atua, ua riro ia ei rāveà no te faaitoitoraa ia tātou. Ia tupu mau te parau tià e te hau o te Atua i roto i teie nei ao e i roto i to tātou fenua.

I roto i to na oraraa, ta na mau parau, ta na faaiteraa e ta na mau haapiiraa ua riro ia mai te tahi faatiàfaahouraa i te tahi tiàturiraa o tei topa i raro e aore ra o tei òre hāùtiùti faahou. O ta te mau Ati luta atoà i manaò e e mea maitai ia vaiho noa mai te rā. Ua hinaaro rā te Fatu e faaora faahou i te mau Parau o ta to na Metua i horoà i to na nūnaa.

Mai te mea na roto i te tiàfaahouraa te titauhia nei tātou ia faatiàfaahou i te mau òhipa o tei pohe e aore ra o te pohe atu ra, e tāmata tātou i te tiàfaahou na mua roa. No te mea eita e tià i te tahi taata o tei taoto e rave i te òhipa, ei taata rā tei tià e aore o tei faatiàhia i nià e to tātou Fatu.

MARAEA Taarii òrometua.

POROI NO TE MAHANA REVARAA

(MAHANA MAHA 20 NO ME 1993)

Taiòraa : ohipa 1/ 1-11

Poroiraa : ohipa 1/ 11

"E te mau taata o Tarirea nei, eaha òutou i tià noa ai e i tiàtonu mārō ai i nià i te rai ra."

E hoa here mā,

Ua ite pinepine tātou e, te mau taata atoà e rave i teie taiòraa, te haamau pinepine nei rātou i to rātou manaò e ta rātou poroiraa i nià iho i te irava 2 e aore ra teie tuhaa, mai te irava 9 e tae ātu i te irava 11, oia hoi, i nià iho i te parau no te "Revaraa" o Ietu. E aha atu ra ia te faufaa e noaa i te taata no te haafanau faahou i te hoê tiaitururaa ora, i te hoê Fatu tei reva. Te manaò peàpeà tera e vai ra i roto i te aau o te mau pipi, i tiàtonu mārō ai i nià i te rai.

Ua rahi aè to rātou hinaaro i te parahi noa i roto i te mahanahana no te tuatiraa i vai na i rotopū ia rātou e to rātou Fatu, noa atu te mau haapāpūraa a Ietu e, eita o ia e vaiiho òtare noa ia rātou, e tonono mai rā o ia i te Varua Maitai ei faaà no rātou i roto i ta rātou òhipa (irava 8). Ua ite atoà tātou e, e ua haapāpū atoà na merahi (ir. 11 v.h.) e e hoi faahou mai Ietu mai teie ta rātou i ite i te revaraa atu.

Ia ite atoà ra tāto, e aita o Ruta e haamau nei i to na manaò i nià i te òhipa e tupu nei i teie taima, i nià rā i te mau parau atoà i faahitihia no teie taata o Ietu. Te ite ra ia tātou e, eita e tià ia faataaēhia te oraraa o Ietu, to na fanauraa, to na poheraa, to na tiafaahouraa, e te parau ta tātou e faaroo i teie mahana, oia hoi, to na faateiteiraahia i te rima àtau o te Atua.

Te tahi manaò o te tià ia faahitihia, e aore ra, te tahi uiraa faufaa rahi o te tià ia uihia, maoti, o te uiraa ia ta te mau apotetoro i ui atu ia Ietu, i te na ô raa e ***"E te Fatu, ei teie nei ānei oe e***

faahoi mai ai i te hau ia Iteraera (irava 6) ?"Te hinaaro tumu i roto i teie uiraa o te titauroa ia Ietu ia faaite pāpū o ia e, no vai mau teie hau (Patireia) tei faahiti noa hia na to na parau. Ua haamauhia ānei teie hau ia Iteraera ? (à Israel ?), e aore ra, no Iteraera ? (pour Israel ?). E manaò teie tei āpitihia i terā tiaitururaa Ati-Iuta e, e haamau te Atua i teie hau no te faatiāmā i te tamarii Iteraera i te rima o te ènemi (te hau Roma), e e riro atoà hoì Iteraera ei nunaa ei reira te mau nūnaa e faufaa hia ai.

Mai te peu, te reira mau te manaò e vai ra i roto i te mau pipi, ua riro mau ia rātou mai te tahi o te mau taata e faaroo pinepine nei i te mau poroiraa a Ruta, tei òre i ite e e ua faahuru ê Ietu i te tiaitururaa Ati-Iuta no te hau o te Atua na roto i te tāmāraa i te reira i te mau faanahoraa poritita atoà.

Te tahi atoà manaò o te tiā ia faahitihia, maoti o te manaòraa ia e, te tau no te mau ètene, ua tae ia i to na hopeà, e ua vaiho te reira i te tupuraa no te patireia o te Atua. Teie rā, e ere ānei hoi teie manaò i te tahi haapāpūraa no te òhipa tei tupu i te mahana Penetetote oia hoì, te fāraa mai no te Vārua Moà, eiaha rā no niā i teie parau no te hau o te Atua.

No reira, i mua i teie uiraa a te mau pipi, e piti tau manaò o te tiā roa ia tātou ia hiò mai.

A tahi : no nia iho ia i teie titauroa ia ite i te "**taime**" (Ei teie nei ānei oe e faahoi mai ai i te hau ia Iteraera : irava 6). Aita e pahonora pāpū i horoà no teie parau.

Teie rā, mai te peu e e rave mai tātou i te manaò tei faahitihia e Ietu i roto i te Evaneria a Mareto 13/32, te haapāpū maitaihia ra i reira e, aore te mau merahi o te rai, aore atoà hoì te Tamaiti i ite i te reira taime, maōti o te Metua anaè. Mai te peu e, aita te reira i horoàhia i te taata ia ite, e aha ia te faufaa te tamataraa i te numera, a faatanotano atu ai i roto i te faanahoraa a te Atua. No reira, e ere atoà ia i te tuhaa na tātou i te iteraa i te reira mahana e tupu ai taua òhipa ra. Tei te Atua anaè rā te ite, te mana e te faanaho i te reira. Te mea faufaa no te mau pipi e no tātou atoà, maōti te òhipa e titauhia ra ia ratou i teie taime, oia hoì, to rātou

faariroraa ia ratou iho ei ìte no Ietu, mai Ierutarema atu, Iutea e Tamaria e tae noa atu i te hopeà o teie nei ao.

Te titauroa tumu i roto i teie parau, ia tupu te faaiteraa i te hau o te Atua na roto ia rātou e i te mana e te tauturu a te Vārua Moà. Teie te faaueraa hopeà a Ietu i ta na mau pipi, hou o ia a vaiiho mai ia rātou.

A piti : Te faaara atea nei te revaraa no Ietu ia tātou e, e hoì mai ā o ia i te fenua nei no te haamau hope roa i te hau o to na Metua. Te haapāpū maira ia teie tau puè irava ia tātou i te ôpuaraa a te Atua e te tuhaa e titauhia nei i te Etāretia i roto i taua ôpuaraa ra. E tāpura òhipa rahi teie i vaiihohia mai i roto i te rima no te mau ite o te Metia, maoti te faaiteraa i te Hau o te Atua.

No reira, hou taua hoìraa mai no na ra, ua riro ia teie tau ta tātou e ora nei i teie nei, ei tau no te faaiteraa e no te faatupuraa i te mau faaueraa atoà ta Ietu i horoà i ta na mau pipi e ia tātou atoà i teie mahana. E 40 mahana, e aore ra, e 40 matahiti i muri mai i te Tiàfaahouraa o to tatou Fatu, te faaara faahou maira teie tau pue irava ia tātou e, o te ômuaraa te reira no te òhipa a te Etaretia, tei riro ei "ìte" no te Tiàfaahouraa e te Revaraa no to tātou Fatu o Ietu Metia. Ta na òhipa : ia poro hope roa hia te Evaneria e te Hau o te Atua e tae noa atu i te hopeà o teie nei ao. Eita teie opuaraa e manuia mai te peu e, aita tātou i pāpū i te òhipa ta tatou e faaite, e aore ra, aita i ìte e, aita teie Fatu ta tatou e tiāturi nei e vaiiho ôtare noa nei ia tātou i roto i teie òhipa. Te āpiti atoà nei rā o ia ia tātou, na roto i to na vārua, no te faatupu te manaò ta na i faahiti i roto i te pure ra e "Ia tae mai to oe ra HAU".

No reira, eiaha ia e tutonu noa i to tātou mata i nià i te raì, aita e ohipa to reira, a haafariu anaè i to tātou aro e to tatou mata i roto i teie nei ao, te vahi i titauhia ai tatou ia riro ei mau ite e ei mau veà-tono, i to na ra ioà e to na ra puai.

Te ìte ra ia tātou e, e aita te revaraa no Ietu i riro noa mai te tahi òhipa tei tupu i nià i te hoè mouà, e aore ra, te tahi hoìraa i nià i te raì no te âmui i te faatereraa a to na Metua (ohipa 2/ 33-35 ; 1Petero 3/ 21-22), te haapāpū atoà mai ra rā te reira i to te Atua âmuiraa i roto i te ao o te taata, oia hoì, ua monohia te taaêraa tino

o Ietu e te Vārua o te Atua. I roto i teie manaò e maramarama maitai tātou i te auraa o te parau no te Revaraa.

"E te mau taata o Tarirea nei, e aha òutou i tiā noa ai e i tiātonu mārō ai i niā i te rai ra ?" I muri aè i to Ietu vauvauraa atu i ta rātou tapura òhipa, ua ravehia atu o ia i niā i te rai, i mua i te āro o to na mau hoa rave ohipa. Te ata te vehi ia na, e tei riro atoà ei fauraò no na i to na Metua ra, te haapāpū atoà maira te reira i te tapaò no te hanahana o te Atua.

Mai te peu e, teie te uiraa i uihia atu e na merahi i te mau pipi, te riro atoà ra ia ei reo tei ui atoà ia tātou i teie mahana, i te na ô raa e "E te mau maru-metia no te Fatu tei tiāfaahou, e aha outou i tiā noa ai e i tiātonu mārō ai i niā i te rai ra" ? Mai te mau pipi i titauhia ia riro ei ite no Ietu, te titau atoà hia nei tātou i teie mahana, eiaha noa ia riro ei **orio-mata** no Ietu, no te faaite i to na hinaaro ta na i faaite noa ia tātou na roto i ta na mau haapiiraa e to na iho oraraa, ia riro atoà ra tātou ei **putariā** no na, no te faaroo i te auē a te mau tamarii herehia e te Atua i te mau hamani-ino-raa atoà e ravehia nei i niā i te fenua ta te Atua i horoà mai ei vauvau e ei òaòaraa no ta na mau tamarii.

Mai te ata i riro ei fauraò no to tātou Fatu i to na Metua na, ia riro atoà ia to tātou faaroo e to tātou oraraa taatoà ei ata (fauraò) no te faaite i te hinaaro o te Atua, e i to na anaè ra hanahana.

I teie mahana, ua autā roa te mau tamarii o te here o te Atua, a farii anaè tatou i to tatou aro i te reo faaara a te Paari, tei na ô mai e :

**"E àti rahi to te metua vahine, aore i tauà i
te autā a te mau tamarii".**

Ia ora na.

Julien MAHAA
orometua

FAAITOITORAA NO TE TAPATI
PENETETOTE93.

(Tāpati30 nome 1993)

Taiòraa: Ohipa: 2. 1-21
Ioane : 20. 19-23.

Irava: Ioane : 20.22

"I na reira maira o ia, e ua haapuai maira i te āho i niā ia rātou, e ua parau maira, a fariīi te Varua Maitai"

E hoa here mā teie a tātou i mua i te parau no teie Oroà o te Varua Moà o ta tātou e haapaò nei ite mau matahiti atoà e tei riro ei haapāpū raa na tātou i to tātou tiaturiraa i te Atua e i ta na òhipa raa i rotopū ia tātou na roto i te mana e te puai o te Varua Maitai.

I roto i teie parau no te Penetetote ta tātou e faahamanaò noa nei i te mau matahiti atoà, e rave rahi mau manaò tei haapāpū e o te taima atoà teie i fanau ai te Etaretia a Ietu Metia. O ia hoi, na roto i to te Varua Maitai pouraa mai i niā i te mau pipi i te mahana Penetetote ua riro te reira mahana ei mea faufaà roa no te huī faaroa i te mea i taua mahana ra a faàtupu ai Ietu i ta na tohu e ta na poroi i to na mau taata.

Teie rā, ia hiò maitai tātou i te pene parau tei maitihia mai no tātou i teie mahana, ei reira tātou e hamata ai i te uiui rii e o ia mau ānei hoi, ua riro mau ānei te mahana Penetote ei òmuaraa mau no te Etāretia, eere ānei te faaite mai nei o Ioane e ua tupu a'e na teie òhipa hou te Fatu a reva ātu ai i niā i te rai, ua tupu teie òhipa i te taima o ia a tiā mai ai mai te pohe mai. E tia atoà ia tatou ia ui e eāha mau te auraa no teie huru faānahoraa òhipa ta te Atua i rave no te horoà raa i teie puai i roto i to na mau aito. E aha o ia i

tāpiti ai i teie tuhaa, aita ānei hoì i ravaì te tuùraa matāmuā, i tāpiti faàhou ai ia tae i te mahana Penetetote.

Ia hiò maitai tātou i te huru no te tupuraa teie parau ta Ioane e faatiā nei no tātou, ei reira tātou e ite ai e, te vai rā ihoā te tahi faanahoraa tei haapaōhia e te Atua no te tupu maitairaa no ta na òhipa.

I te taima a faā mai ai Ietu i ta na mau pipi ua ite aè na rātou e aita faàhou te tino o Ietu i roto i te menema, e ua faaroo atoà rātou i te mau faàtiaraa a te feia te ite mata ia Ietu i muri aè i to na tiàfaahouraa mai mai te pohe mai. Terara, noa atu teie mau parau pāpū no te tiàfaahouraa no te Fatu, o ia hoì ua ūpootiā te Fatu i roto i ta Na àroraa i to te Pō, aita ihoā te mataù e te hepohepo i òre roa i roto ite mau pipi. Te haàpāpū nei te ìrava 19 e **"Ua òpanihia na òpani i te mataù i te Ati-Iuta"**. E tapaò ia no te taia rahi e vai rā i roto i te àau o te mau pipi e te pāpū òre atoà i mua i te òhipa e rave i muri aè i te tiàfaahouraa no te Fatu.

Ia hiò maitai tātou ua àmui mai te Fatu i rotopū ia rātou i te taima manaò òre hia e rātou eiaha rā i te taima a manaò ai rātou e te òra ra te Fatu e e farerei rātou ia Na. E i mua i to rātou huru peàpeà ua hinaaro te Fatu e tauturu ia rātou e faatiā faàhou ia rātou noa atu to rātou faarue raa ia Na aita i maōro roa aè nei. No reira atoà paha rātou i oaoa ai i te ite mataraa ātu ia Na.

Te tumu matamua roa i hinaàro ai Ietu e farerei ia rātou eere ia no te faaòàò ia rātou e i muri aè parahi mai ai i rotopū ia ratou i roto i te hau ta Na i faànaho mai no rātou. E ere roa atu o te reira o ta te Fatu e hinaaro ra. Ua hinaaro ra o Ia e ia ite maitai rātou i te faufaà no te tapura òhipa i faataahia e na rātou e haapaò e e faatupu. Ua haere mai Ietu e titau ia rātou tei paruparu, tei mataù, tei taponi e tei horo e i mua i te fifi, ia tià e ia riro ei mau veà no ta na òhipa e no te hinaaro o te Atua. Ia rave rātou i te òhipa tei hamatahia mai e Ietu e tei faàtaime hia i nia i te tatauro. E ia hiò Tātou i te ìrava 23, ei reira tātou e ite ai i te tumu hoè roa o ta rātou tapura òhipa. **"Ta outou i faaòre i ta rātou hara ra, ua faaòrehia ìa; e ta outou i vaiho i ta rātou hara ra, ua vaihohia ìa"**. Ua titauhia ratou ia faatia i ô nei i te ao nei i te huru no te haavāraa a te Atua, o ia hoì o te faaòreraa hara. Teie ra eaha te taata e hinaaro mai ai i teie huru poroi, e nahea rātou e tiàturi ai i teie huru horoà ?

Ei pahonora, e tià ia i te pārau e, te tumu e tià ai i te taata ia faarii i teie huru poroi, no te mea ia no roto mai i te tahi taata tei mauui i roto i ta na faaiteraa, e i roto i to na oraraa. Ua faaino hia na o ia, ua pari hia na, e ua haapohe hia na i nià i te tatauro. E noa atu ra te reira huru to te taata i nià ia Na, ua faaòre o ia i ta rātou hara, ua faatià faàhou ia rātou e ua tāmā i to rātou ìno e i ta rātou mau hapa. Te rā te tumu hoê roa e pee ai te taata na muri iho ia Na e e tiàturi ai i ta Na poroïraa no te faaòreraa hara a te Atua.

Ua ite atoà te Fatu e eita teie òhipa i te mea òhie, no reira ua horoà o Ia i te tahi mana taa ê i roto i ta na mau pipi. E ia au mai ta to Na Metua i tono mai ia Na te tono atoà nei o IA ia rātou, e ia au atoà mai ia Na ra ua òhipa Na o Ia mā te puai o te Varua Moà, o ia atoà ta na mau pipi. Hoê ā atoà huru e mai te papetitoraa hia o Ietu, te na ô ra o Ioane : **"Hiò atura vau i te Varua i te pouraa mai mai te raï mai, mai te uùpa ra, e ua faaea ihora i nià iho ia na"**(Ioane 1.32)

E au ra rā, e e maere rii tātou i te huru taa ê teie huru tonoraa mai i te Varua i nià i te mau pipi, e ua taa ê rii e tei tupu i roto i te faatià raa ia au i te puta Ohipa. I reira ra te haapāpūhia ra e ua tau mai te Varua maitai i te mahana Penetetote. E te vai rā atoà ra ihoā te taa ê raa i te pae no te huru o to te Varua Maitai taùraa mai i nià i te mau pipi.

I roto i ta Ioane faàtiaraa, **"Ua haapuaï noa maira i te āho i nià ia rātou"** (ir. 22). i roto i te puta Ohipa te faaitehia ra e ua tupu taua òhipa ra **" mai te mataï rahi ûàna ra"** (ir.2). Noa atu ra teie huru taa ê raa ua i ihoā te mau pipi i te Varua Maitai.

Teie ra mai ta tātou i ui na i mua aè, eaha paï te Atua i na reira ai i te rave, aita anei hoï i ravaï te raveraa matamua, aita anei i ravaï te tonoraa matamua o te Varua Moà. Eaha te tumu i tataipiti ai, te vai rā ānei hoï te tahi mea tei moè hia.

I roto noa i te tahi hiòraa, i te taima a haere mai ai te Fatu e farerei i te mau pipi i roto i to rātou fare i muri aè i to Na tiàfaahouraa, e ere atoà te mau pipi i te mea ìneïne roa no te haere e faaite i te parau api no to na tiàfaahouraa mai te pohe mai. Eaha te tapaò no te reira, o ia hoi o te huru ia o Toma, e tae noa atu i na pipi no Emauta. E mau tapaò anaè te reira tei haapāpū mai e aitea te mau pipi i ite maitai e eaha ta rātou e haere e faaite.


Ua í ihoā ia rātou i te Varua Moà i te "**haapuaì raa**" mai Ietu i te āho i niā ia rātou, tera rā, aita te reira i ravaì no te turairaa ia rātou i rapae i to rātou fare no te haere e poro haere i te Evaneria. Ua hamata ra te Varua Moà i te òhipa i roto ia rātou mai taua taima mai rā, ua àtuātu i to rātou faaroo, ia òre ia pohe e ia òre ia paruparu, e i te tau mau ra , ua turaì ā te Atua ia rātou ia tiā e ia parau ma te mataù òre i mua i te rahiraa taata tei àmui mai i te mahana Penetetote i te Evaneria faaōra a te Atua.

E hoa mā eere ānei e mai te reira ihoa tātou te Etaretia i mua i te òhipa a te Atua. Ua titauhia tātou e haere e faaite haere i te parau a te Atua i te mau vahi atoà, no te tahi ra mau fifi taa ê e mau huru rau, eita tātou e tiā, no to tātou anei taiā, haama, paruparu e aore ia ìneìne òre. Eita ra e faaea te titau raa a te Atua, e tamau noa ra o ia, i te pū, e ia tae i te taima ta na i maìti ei reira oia e haapapu mai ai i to Na hinaaro ia tātou. Hoê ā atoà ia huru no te mau pipi, aita ato'a Ietu i faahepo oioi ia rātou, "A tiā, a haere a faaite i to te ao e, te òra nei au", aita roa ātu ua tiaì faàhou ra o ia, e na Na i faataa mai i te taima, ei reira te mau pipi e haere ai, aita e taata i parahi noa, ua tiā paatoà, e ua parau paatoà.

I roto i te parau no to tātou papetitoraa hia, eere anei ua fariì atoà tātou i te Varua Moà. E mai te peu e o te reira ta tātou e tiàturi ra, e tiā atoà ia ia tātou ia àtuātu maìtai i te reira ia nehenehe ia na ia turaì atoà ia tātou, no te raveraa i ta na òhipa. Ia rave tātou i taua òhipa ra ma te tuùtuù òre e tae noa tu i te taima a riro atoà ai tātou mai te Etaretia tei faaite hia mai e te puta Ohipa pene 2.

Iaorana

RalphTeinaore
òrometua



VEA OROMETUA

Episetole papaihia ei faaitoitoraa
e ei taamura a i te mau tavini o te Atua
tonohia e te Ekalesia

N°40

1993

Papeete, i te 17 no Novema 1993.

I te mau tino orometua
i roto i na Tuhaa e 8,

Ia ora na i te aroha o te Atua.

E hoa here mâ e, terâ mai â ta tâtou veà-orometua ei tautururaa ia tâtou i roto i te mau oroà hopeà matahiti e fatata mai nei ia tâtou.

Te mau hohoà aòraa e vai ra i roto i teie nei veà-orometua, e mea faaineinehia atu ia e te hoê mau taeaè-orometua o ta tâtou e haamauruuru maitai nei

Na tâtou ia te reira e haapaò maite ia au i te mau faataaraa i muri nei:

- Tiairaa I : Tapati 28 no Novema 1993
- Tiairaa II (Oroà) : Tapati 05 no Titema 1993
- Tiairaa III : Tapati 12 no Titema 1993
- Tiairaa IV : Tāpati 19 no Titema 1993
- Noera (Oroà) : Mahana maa 25 no Titema 1993
- Pô Matahiti : Mahana pae 31 no Titema 1993
- Matahiti Apî : Mahana maa 01 no Tenuare 1994.

Te faahaamanaòhia atu nei tâtou e, te vaira ihoa to tâtou pureraa pô Noera i te pô mahana pae 24 no Titema o ta tâtou e haapaò maite e tae noa atu i te pureraa hepetoma no te hoêraa o te mau maru-metia mai te tāpati 2 no tenuare e tae atu i te tāpati 9 no tenuare 1994, i nià i te tumu parau: "Te ùtuafare o te Atua, tītauhia ia ora mā te aau hoê e mā te varua hoê" (Ohipa 4/23 - 37).

No taua hepetoma ra, e faatiahia ihoa te Oroà a te Fatu i te tāpati 2 no Tenuare na reira atoà i te tāpati 9 no Tenuare, mai tei matarohia e tātou.


E tuhaa rahi tei pûpûhia mai e te Fatu o te Etāretia ia tātou no te apeeraa i te nunaa o te Atua i herehia e ana, i pûpû ai o ia i to na taatoāraa e i to na ora no na, no taua nunaa ra.

A faataa hope roa atoà tātou ia tātou no te nunaa o te Atua e ia here hoi ia na ma te aau, ma te varua e ma te manaò atoà.

O to te Fatu ia hinaaro ia tātou i faaroo ai o ia ia tātou tatai-tahi ei tia i no to na nunaa.

A fārii mai i te tapaò faatau-aroha o te Apooraa Faatere ia outou, i to outou mau ūtuafare, i ta outou mau Apooraa Tiātono e tae noa atu i ta outou mau paroita e amo itoito nei i te mau ohipa a te Etāretia.

Ia haamaitai mai te Atua ia outou i teie oroà Noera e te Matahiti Apī 1994.

Te Peretiteni,

Jacques HORAI orometua

TIAIRAA I

(Tāpati 28 no novema 1993)

Taioraa : Mareto 13 : 33 - 37Ir. faaitoito : Mareto 13 : ir. 33

“ e haapaò maitai, e faaitoito e e pure, aita hoì òutou i ìte i taua taura ”

Òmuaraa:

E hoa here mā ia ora na i te aroha o te Atua i to tātou farereiraa i teie tāpati mātamua no te tiairaa. Oia mau te tomo nei tātou i roto i te tau e haamanaò ai tātou i te aroha e te rahi o to tātou Metua i te rai tei tonono mai i ta na Tamaiti fānau-tahi ia ora te feiā atoà i faaroo ia na. Ua riro atoà te reira tau ei faaineineraa ia tātou tātai-tahi i mua i taua haereà mai o to tātou Fatu i reira tātou e haamanaò i te mau òhipa i haahia mai e tātou i roto i te tau ta te Atua i horoà ia tātou.

Teie rā, e ère o tātou anaè teie e faaineine nei no taua tau ra. Mai te mau matahiti atoà, te àrepurepu nei to te fenua i te faaineineraa i taua òroà rahi ra. I reira, eita te taatoàraa e ò òhie noa i roto i te òroà no te òaòaraa. E faaea mai te tahi i rāpae. Ua riro ei òtoraa no te tahi pae.

Mai te mea tei roto tātou i te tiairaa, te faaite atoà ra ia tātou e tei roto tātou i te hinaaroraa i te tahi mea tei òre ā i noaa e aore ra tei òre ā i tupu atu ra. Te na ò nei rā te reo o te Fatu, “e haapaò maitai, e faaitoito e e pure, aita hoì òutou i ìte i taua tau ra”. Mai te mātamua mai to te Etāretia parahiraa i roto i te tiairaa no taua tau ra. Mai te mātamua mai to na hinaaroraa ia tupu te parau i parauhia e te Fatu. E rave rahi atoà o tei haere mai no te faaturori i taua tiairaa ra. I teie mahana e tiā roa ia tātou ia uiui i roto ia tātou iho e aha rā te huru o te tiairaa o ta tātou e ora nei.

I mua i ta na mau pipi, te horoà nei te Fatu i te tahi mau faaararaa i nià i te huru oraraa o te mau pipi e rave i te mau taima e vai iho mai ai O ia ia rātou. E ère roa atu i te mau parau òaòà. E mau parau riàrià rā, o tei faaite i te huru no te mau àti e farereihia e rātou.

Te faaau nei O ia i te tiairaa mai te tahi taata o tei vai iho i to na fare, ma te horoà i te òhipa na te mau tāvini. Aita rā O ia i ite i te taima e hoì mai O ia i te ùtuafare. To na hinaaro, ia hoì mai O ia te ara ra teie mau tāvini. Oia hoì te mānaònaò ra i te hoiraa no te Fatu ùtuafare. Oia hoì, te mānaònaò ra i te huru no te òhipa i horoàhia mai ia rātou. Ua oti ānei, e mea maitai ānei, e mauruuru ānei te Fatu ùtuafare.

Oia mau, ahiri ua ite na tātou i te hora e hoì mai te Fatu ùtuafare, eita ānei tātou e tiaì i te taima fatata atu i taua hora no te rave i te òhipa i faauehia mai e rave. Ua ite atoà tātou i te reira huru raveraa òhipa aita ia hoè mea maitai. Ua riro te hoiraa no te Fatu ei feruriraa rahi na te feiā faaroo i te mau tau atoà. Ua tāmata noa na te taata e tuu i te ôtià no to na hoiraa mai. Aita roa rā i tiàhia i nià i to tātou manaò taata.

I te tahi aè pae, ua parahi te Etāretia i roto i te hoè oraraa faaroo e aita e tiaì faahouraa i te hoiraa mai o te Fatu. Oia hoì, ua parahi i roto i te tiàturiraa e, i teie nei ua hope te mau mea atoà. Ua ora tātou i te aroha o te Atua Metua. A hoì mai O ia i teie mahana e aore ra ananahi, aita te reira e fifi, i te mea e tei roto tātou i te here o te Atua. I mua i te reira huru, e tià atoà ia parau e, ua morohi atoà te tiàturiraa. Aita e tiairaa, aita atoà ia e hinaaro faahou i te Fatu. Na hea ia e ite ai ia hoì noa mai te Fatu o te ùtuafare. Na hea ia e faaroo faahou ai ia pii noa mai to na reo i te hiti o te ùputa. Eita ānei hoì te Fatu iho o te fare te tiahia atu i rāpae. I te mea e ua hope te mau mea atoà i to tātou rima, i roto i to tātou mana, ua fatu te tāvini i te ùtuafare.

E ère ānei te reira te òhipa i tupu mai tahito mai ā e tae roa mai i te tau no te Fatu. Ua haere mai O ia i ò na iho e aita to na iho ra taata i ite atu ia na.

E aha te huru tiaíraa ta Na e hinaaro nei ia tātou i teie mahana. E ère ānei i te taata tei ara, e te ara ra. Oia hoì, tei ìte i te huru o te ùtuafare i te mau taimè atoà, tei ìte atoà i te òhipa e rave ia au i te hinaaro o te Fatu. Eère roa rā i te faaineineraa i te tahi fāriiraa o tei faahanahana i te taeraa mai o te Fatu. Mai te tahi peu nehenehe roa o tei taitai i to tātou roo na roto i teie nei ao. E ère teie i te tahi peu o ta tātou e rave i te mau matahiti atoà. E titauraa rā ia vai ara, eiaha i te hoè noa taimè i roto i te matahiti, i te mau taimè atoà rà.

“E haapaò maitai, e faaitoito e e pure, ...” na roto i teie tau parau, te haapāpū nei te Fatu i ta na mau pipi, aita rātou i vai iho òtare noa-hia, aita te Fatu i faaruè noa mai i to te ùtuafare. Te haapāpū atoà mai ra e, te araraa, te tiaíraa e ère ia i te tahi òhipa òhie o te maraa noa ia tātou anaè. E ani rā i te tauturu i te Atua ia haere mai O ia iho e horoà ia tātou i te itoito e te haapaò maitai. E pure ia òre tātou ia vareà i te taòto. No te mea aita e eita tātou e ìte i taua tau ra.

I te mau taimè hopeà o te Fatu, ua ìte tātou i ta na mau pipi iho i te poheraa i te taòto i te taimè mau a hinaaro ai O ia ia ara rātou. O ia iho i roto i te paruparu e te hepohepo ua ani O ia i te Metua i te itoito i tiàhia te hinaaro o to na Metua i te raì.

Ei tautururaa ia tātou i roto i teie tau no te tiaíraa, e mea maitai ia parahi atoà tātou i roto i te pure i òre tātou ia roìhia mai e ua vareà anaè i te taòto.

Ia maitai òutou paatoà na i teie tāpati e ia tauturu mai te Fatu.

Maraea Taarii
òrometua

I mua i ta na mau pipi, te horoà nei te Fatu i te tahi mau faaararaa i nià i te huru oraraa o te mau pipi e rave i te mau taime e vai iho mai ai O ia ia rātou. E ère roa atu i te mau parau òaòà. E mau parau riàrià rā, o tei faaite i te huru no te mau àti e farereihia e rātou.

Te faaau nei O ia i te tiàraa mai te tahi taata o tei vai iho i to na fare, ma te horoà i te òhipa na te mau tāvini. Aita rā O ia i ite i te taime e hoì mai O ia i te ùtuafare. To na hinaaro, ia hoì mai O ia te ara ra teie mau tāvini. Oia hoì te mānaònaò ra i te hoìraa no te Fatu ùtuafare. Oia hoì, te mānaònaò ra i te huru no te òhipa i horoàhia mai ia rātou. Ua oti ānei, e mea maitai ānei, e mauruuru ānei te Fatu ùtuafare.

Oia mau, ahiri ua ite na tātou i te hora e hoì mai te Fatu ùtuafare, eita ānei tātou e tià i te taime fatata atu i taua hora no te rave i te òhipa i faauehia mai e rave. Ua ite atoà tātou i te reira huru raverā òhipa aita ia hoè mea maitai. Ua riro te hoìraa no te Fatu ei ferurirā rahi na te feiā faaroo i te mau tau atoà. Ua tāmata noa na te taata e tuu i te ôtiā no to na hoìraa mai. Aita roa rā i tiàhia i nià i to tātou manaò taata.

I te tahi aè pae, ua parahi te Etāretia i roto i te hoè oraraa faaroo e aita e tià faahourā i te hoìraa mai o te Fatu. Oia hoì, ua parahi i roto i te tiàturirā e, i teie nei ua hope te mau mea atoà. Ua ora tātou i te aroha o te Atua Metua. A hoì mai O ia i teie mahana e aore ra ananahi, aita te reira e fifi, i te mea e tei roto tātou i te here o te Atua. I mua i te reira huru, e tià atoà ia parau e, ua morohi atoà te tiàturirā. Aita e tiàraa , aita atoà ia e hinaaro faahou i te Fatu. Na hea ia e ite ai ia hoì noa mai te Fatu o te ùtuafare. Na hea ia e faaroo faahou ai ia pii noa mai to na reo i te hiti o te ùputa. Eita ānei hoì te Fatu iho o te fare te tiahihia atu i rāpae. I te mea e ua hope te mau mea atoà i to tātou rima, i roto i to tātou mana, ua fatu te tāvini i te ùtuafare.

E ère ānei te reira te òhipa i tupu mai tahito mai ā e tae roa mai i te tau no te Fatu. Ua haere mai O ia i ò na iho e aita to na iho ra taata i ite atu ia na.

TIAIRAA II
(Tāpati 5 no Titema 1993)

Taiòraa : Mareto 1/ 1-8
Faaitoitoraa : Mareto 1/5

"Ua faahope maira to te fenua ra o Iuta e to Ierutarema ia na ra, e papetiohia iho ra e ana i te pape ra i Ioritana, mā te fai i ta rātou hara."

AROHARAA :

E hoa here mā, te reo o ta tātou irava te na ô ra (*irava 5*). Ua faaroo mai tātou i te taiòraahia ta tātou parau, e te taima i faahiti ai te pāpai Evaneria i teie manaò òia hoì tei te ômuaraa no te Evaneria a Mareto i te pene hoè.

E hiò mai tātou i teie nei no te aha to Iutea e to Ierutarema i haere ai e papetito ia rātou.

I roto i te irava hoè te na ô raa :

"Te haamataraa o te Evaneria o te tamaiti a te Atua o Ietu-Metia."

Teie te haamataraa no te òhipa tei tupu, i te tau no Ioane òia hoì i te Evaneria, te parau âpī-òaða, e taua parau âpī-òaða o Ietu-Metia ia, .i roto i te irava piti e te irava toru :

"tei pāpaihia i roto i ta te mau perofeta ra, Inaha e tono vau i tau veà i mua ia òe, e na na e haamaitai i to òe êà i mua ia òe. E reo no te hoè i te tiàororaa i te metepara, E haamaitai òutou i te êà o Iehova, e faatitiaifaro i to na haereà". Haamanaòhia maira ia tātou i te tahi tohu a te perofeta ra o Itaia i te pene 40/ 1-11 òia hoì te piti no ta tātou taiòraa ia au i ta tātou tarena taiòraa pīpīria.

Te titauhia maira i reira i te tahi faaineineraa, no te fāriu, i te taeraa mai o te Metia :

E ui tātou : E na hea i te faaineineraa.

Te pahonora a mātamua teie ia i roto i te Itaia :

A faanehehe i te êà o Iehova, e faatitiāifaro i te fenua marō i te haereà o to tātou Atua.

E faaūhia te mau peho, e faahaèhaahia te mouà e te mau àivi, e faatitiāifaro hia ei vāhi pāpū (irava 3 e te 4)

Terā te piiraa a Itaia i to na nūnaa, tera te piiraa ia tātou i teie mahana. Teie mahana te piti no te tiairaa, tiairaa i te haereraa mai o te Fatu. Te titauhia nei tātou ia na reira atoà i roto i to tātou oraraa. I te taima a faarahia mai ai tātou e tae mai te tahi manihini, oioi tātou i te faanaho i to tātou mau ùtuafare oioi tātou i te tāmā i te āua, tāmā i te fare, faaineinei i te tahi fāriiraa no te taeraa o te manihini. Areà te parau no to tātou Fatu, te parau nei tātou : " *e te Fatu e te Fatu, a fārii mai ia ù* ". Teie rā, ua fārii ānei tātou i teie Fatu, ua fārii ānei tātou i ta na mau titauraa, terā mau òhipa e faateitei ra ia tātou, ua vavahi ānei tātou no te faahaèhaa, no te tamarū ia ànaanatae te Fatu i te fārii ia tātou. Aita ānei tātou e taponi noa ra i muri i te tatauro no Ietu a parau noa ai : " *Aita e peāpeā, e aroha noa o ia* " No reira tātou e faaroo mai nei te titauhia mai nei tātou ia tatarahapa ia papetitohia, òia hoì ia hopu tātou i te pape tamāraa ia tātou, ànaanatae atu ai tātou i te Atua e titau ia tātou i te ôroà fānauraa no ta na Tamaiti e fatata mai nei.

E mea tià ia tātou i teie mahana ia ìmi e te hea roa tātou, e ta tātou tāviniraa e to tātou tiaturiraa, aita ānei tātou e ātea ra i te Atua, eita ānei e tià ia hiò i te mau rāveà no te hoì i te Atua ra Te na ô maira te reo o ta tātou irava e :

"Ua faahope maira to te fenua ra Iuta e to Ierutarema ia na ra, e papetitohia iho ra e ana i te pape ra i Ioritana, mā te fārii i ta ratou hara."

To te pāroita nei, teie te òhipa e titauhia mai nei ia tātou mai te ravehia to Iuta e to Ierutarema ia faì tātou i ta tātou mau hara, òia hoi ia ìte tātou i ta tātou mau hara, a nehenehe atu e tāmāhia taua repo ra i te pape no te papetitoraa. Te pape no te ora, te pape no te aroha, te pape no te faatiāmāraa nehenehe atu ai tātou e hoi i te Atua. Nehenehe atu ai ia tātou ia fānau faahou.

I teie ra taimē, te parau ra o Petero i roto i te toru no te taiòraa o teie mahana (II Petero 3/ 14):

"E teie nei, e aù mau here e, o te reira mau mea ta òutou e tiaina, e faaitoito, e haapāpūhua ia roohia mai òutou e ana mā te hau, ma te poraò òre e te hapa òre."

IA ORA NA.

Hitiura BENNETT
Orometua

TIAIRAA III

(Tapati 12 no Titema 1993)

Taiòraa: Ioane 1.6-8; 19-28.

Irava: Ioane 1.7-8.

“I haere mai taua taata ra ei ite, e faaite i taua maramarama ra, ia faaroo te taata atoà ia na. E ere râ oia iho i taua maramarama ra, i haere mairâ e faaite i taua maramarama ra.”

E hoa here ma,

Ua tae tātou i teie tau no te tiairaa, e ia au i ta tātou faanahoraa no te oraraa o ta tātou Etāretia, e tau atoà teie ei reira tātou e hiò faahou ai ia tātou iho, i to tātou huru i roto i te tuātiraa i to tātou Atua. No te aha, no te faaineine raa ia i te fāriiraa i teie Faaora no te Ao oia te Metia. E no te mea atoà hoì mea tano atoà ia tuatapapa faahou tātou e eaha hoì ta tātou tuhaa ohipa no te faaiteraa i teie Fatu to tātou e te ohipa faaora ta na i faauehia e haere mai e rave i roto i teie nei ao.

E i roto i teie ohipa rahi tei faaue hia ia tātou, oia hoì i te tuatapapa raa i to tātou iho parau, e tamata na tātou na mua roa i te hiò e e o vai hoì tātou, e tei hea tātou. Hoê a huru e, mai te mau parau ta tātou e faaī noa nei no te tahi mau aniraa ta tātou e faatae nei i te mau taiete no te tahi mau aniraa ohipa e aore ia no te tahi mau aniraa tauturu i te mau taiete rahi e te mau pū no te Hau fenua. Te vai ra ihoa te mau parau e ani hia mai e haapapū tātou, ei reira tātou e faaī ai i teie mau parau, ia maramarama te mau taata e taiò mai i teie mau parau e o vai mau â tātou. Te fā no teie tuhaa ohipa oia hoì ia ite hia tātou ei reira e papū ai te ohipa, ei reira e manuia ai te opuàraa.

Te parau papū oia hoì, i te mau vahi atoà, e no te mau taata atoà mea faufaa roa ia ite hia e o vai ra ratou, no hea mai ratou. E rave rahi mau taata tei faataa i te tahi taima rahi no to ratou oraraa no te imi raa e o vai ratou e no hea mai ratou. e rave rahi o

ratou tei hinaaro i te haapapū i to ratou hiroà tumu mau, ia ite hia mai ratou e o vai mâ ratou.

Te vahi faufaa roa e te maere rahi i roto i ta tātou pene parau oia hoi ia taio tātou mai te òmuaraa e tae atu i te hopeà, mea rahi aè te taimē te faaite hia mai nei ia tātou e, no Ioane Papetito e ere oia i tera mau mea tei manào hia e o na ia. Te auraa aita roa atu e haapapū hia mai ra e o vai o Ioane Papetito. Tei faaite hia mai oia hoi “ **E ere râ oia iho i taua maramarama ra ...**”; e i mua i te uiuira a te mau Tahuà e te mau ati Revi, ua haapapū atoà o Ioane Papetito e “**E ere au i te Metia, e ere au o Eria, e ere atoà i te perofeta**”.(Irava 20-21).

E inaha e taata tuiroo o Ioane Papetito, eiaha no te mea ua rave oia i te tahi mau ohipa rarahi e aore ia no te tahi mau tapào maere ta na i rave, ua pāpetito noà ra oia. E ere atoà no te mau parau ta na i faahiti, noa atu ia te teimaha o taua mau parau ra i te tahi mau taimē. Ua tui to na roo no te mea, i te haamataraa o ta na ohipa, aita to na parau i haapapū hia na mua roa, ta na ra tapura ohipa, o te reira tei haafauaa hia.

E haapiiraa rahi teie e vai nei i roto i teie parau no tātou e te hui faaroo. Te mau taata o te ao nei, te imi ra ia i te mau raveà atoà ia iteahia mai ratou, e o vai ra ratou. No tātou te hui faaroo, e mata na tātou i te haapapū na mua roa e, e ere tātou i te mea faufaa roa, e aore ia e ere to tātou parau i te mea faufaa roa. E penei aè ia na reira tātou ei reira mau tātou e itehia mai ai e te taatoà raa.

E ere tātou i te maramarama o teie nei ao. Oia mau; i te mau taimē atoà tātou e tiāturi ai e, e matara ia tātou te mau fifi atoà, e i te mau taimē atoà tātou e manào e, e tei ia tātou ra te faaòtiraa e eaha ta te taata e tià ia manào e ia tiāturi, e riro te faaroo Teretetano ei faaroo tei haavī e tei faatītī. O te Metia anaè te maramarama, e ua titau hia tātou te hui faaroo ia parahi i roto i te pure ma te haehaa e ma te ani ia arataihia tātou e taua maramarama ra. E tià i te Etāretia, na roto i te aroha o te Atua, ia riro ei faaìteraa i te maramarama o te Atua tirara atu ai. Mai te

mea noa atu ra e faariro tātou ia tātou iho e o taua ia maramarama ra, ei reira mau tātou e atea ai e e tapu roa ai i to tātou tuātiātiraa i te Puna mau o te Maramarama.

E ere tātou i te mea maitai aè e i te mea moà ai i te tahi pae. I te mau tau atoà e i te mau tenetere atoà, ua vai na te here , te aroha, te faaroo e te faaore raa hara ei ohipa tumu na te hui faaroo. Terara ua riro atoà na te mau Teretetano ei mau taata faaroo ore, te haapaò ore i te mau ture a te Atua e te teòteò atoà i te tahi mau taimè. Ua hahi te hui faaroo e ua tupu mai te mau amahamaha raa. To tātou aai ua i ia i te mau parau no te tiàturiraa e te faaroo ore, no te mea i te tahi mau taimè aita tātou i haapaò maitai i te ohipa maitai tei titau hia ia tātou ia rave.

Penei aè tātou i te uiui noa e, e teie nei mai te peu aita tātou i ite e o vai tātou, eaha ia tātou e no hea mai tātou?

Ta tātou irava te na o ra ia, “E ere râ oia iho i taua maramarama ra...”, oia hoì e ere Ioane papetito i te Maramarama, “I haere mai râ e faaite i taua maramarama ra.”

Mai te peu e e ia hinaaro to te ao e ite i te maramarama, e na roto noa oia i ta tātou mau raveà e to tātou puai taata eita roa atu to te ao e fārerei noa aè i te Faaora o te ao. Teie ra te vai nei te parau apì oaoa, o te mea ia te vai ra te Hoè o tei riro ei Maramarama ora o te ore roa atu to na Tiàturiraa e to na Aroha e tauì.

Penei aè tātou i te uì faahou e, o vai ia tātou, e eaha ta tātou tuhaa. E pahono noa ia tātou, e mai ia Ioane Papetito ra ia tātou, ua riro noa tātou ei faaìteraa i te taata atoà i taua Maramarama Faaora ra, tirara atu ai. Te toea no te mau parau atoà ta tātou e faaite e mau peu taata noa ia na tātou, e ere roa atu i te mea faufaa, i roto i te opuaraa faaora a te Atua i to te ao nei.

I roto i teie tau no te Tiairaa, aita atu e parau faufaa roa ta tātou e faahiti oia hoi o te faaara raa i to te ao, na roto i te pure, na roto i te arueraa e te haere mai nei te Faaora o te ao, te Maramarama mure ore o tei faaite mai i te hinaaro o te Atua e faaora i to na nunaa i roto i teie mau tau arepurepu e te hepohepo mau.

Ia tauturu mai e ia tiai mai te Atua i ta na Etāretia i te ohipa raa no te tae raa mai no to na Patireira i te ao nei, i rotopū i te taata atoā. Ma te haamanaò e, ua riro noa oia ei hiò hipa tei faaite i to te ao i te Maramarama ora e vai ra i roto i te Metia, te Faaora o te ao nei.

Ia ora na i te Fatu.

Ralph TEINAORE
Orometua

TLAIRAA IV

(Tāpati 19 no Titema 1993)

Ruta : 1/26 - 38.*“Ei tāvini au no te Fatu”.*

E to te hui faaroo, ia ora na i te here e te aroha o te Tumu Nui, i teie nei tāpati hopeà no te tau no te tiaàraa o tei orahia mai e tātou.

“Ei tāvini au no te Fatu”. E reo teie no Maria, teie nei potii o tei momoàhia ia Iotefa no te huaai o Tavita. E parau teie tei parauhia e teie potii i nià i te Merahi ta te Tumu Nui i tonono mai e fārerei ia na, no te faaite i te hoê parau àpī òaòà.

“Ia ora na, e tei herehuahia mai e ! tei ia òe te Fatu, e tei maitai i te mau vahine atoà”.

O te reo matamua ia no te Merahi ia Maria, i roto i to raua fārereiraa. E reo haamaitai teie, e, e reo faateitei teie no te Merahi i teie nei potii. I te mea e, ua hiò mai te Atua ia na, e ua ìte mai i roto ia Maria, te hoê vahine maitai e te haapaò i rotopū i te mau vahine atoà.

Teie rā, i mua i teie mau parau haamaitairaa e faateiteiraa na te Merahi, te ìte atoà nei tātou i te au òre o Maria i teie nau parau, o tei faatupu i te riri i roto i to na àau.

Ite maira rā te Merahi i taua huru no na ra, parau maira ia na na ò maira, “Eiaha e mataù e Maria, ua herehia mai òe e te Atua. E inaha, e tō òe, e fanau ta òe tamaiti, e na òe e mairi i te iòà ia Ietu. E rahi òia, e e parauhia i te Tamaiti na te Teitei : e na te Fatu ra na te Tumu Nui e horoà mai i te terono o to na ra metua o Tavita no na : èi ia na te hau i te fetii o Iatopa e àmuri noa atu ; e e òre roa to na Hau e mure”.

E hoa here mā, te hinaaro nei te Merahi, i te haapāpū maitai, na roto i teie mau parau, e noa atu te tiāraa Atua o te Tamaiti na Teitei, te Tamaiti a te Atua, e rave atoà rā ò ia i te huru taata na roto i to na fanauraa. I teie nei te hinaaro nei te Atua e vaiho i to na terono hanahana, no te tomo mai i roto i to tātou ao, no te haamau e no te faatupu i to na Hau, te Hau mure òre.

E no te reira, aita atu ia e raveà, maori rà, na roto i te fanauraa, te riroraa mai ia ei taata mai te mau taata atoà, tei ite i te poia, te poiha, te rohirohi, e te mau iui. E faaotiraa rahi teie ta te Tumu Nui i rave no na e no to te ao nei. I maiti ai òia i teie nei potii ia Maria ei mauhaa no te faatupu i to na hinaaro e ta na Parau ta na e parau nei na roto i ta na Merahi ia Taperiera. E parau maere rahi atoà rā teie o ta Maria e faaroo nei, e e parau o ta to na àau e ore e farii roa ra, e te uiui atoà ra oia i roto ia na iho e, eaha rà teie mau parau, e no te aha teie mau parau i parauhia mai ai i nià ia na. Aita anei hoì teie Merahi i hape i te vahine. I parau ai Maria ia na e : “èaha ia e tià ai, àore hoi au i ite i te taata”. Oia hoì, nahea ia mau òhipa e tupu ai, àore ā hoi au i taòtohia e te tane.

Mai te mea ra, i roto i te feruriraa o Maria, ua ànoi noa to na mau manaò, no teie mau parau maere rahi o ta na e faaroo nei, e o ta na iho i ore i manaò e e parauhia teie mau parau i nià ia na te hoè potii oraraa haehaa. Nahea e tià ai ia na, ia tō e ia fanau i te Tamaiti a te Atua, i te mea e, e potii momoà noa hia òia ia Iotefa.

Teie parau e faahitihia nei e Maria i mua i te Merahi, e parau ia no roto i te àau no te hoè taata o tei òre i maramarama e o vai teie e parau mai nei. E to tātou atoà te reira huru, tātou te mau Maru Metia tei fai ia Ietu-Metia ei Fatu e ei Faaora, to tātou teie huru i mua i ta na Parau e i to na Hinaaro. To te àau farii àtāraa i ta na Parau e to tātou taupupū i te faatupuraa i te Hinaaro o te Atua, na roto i ta tātou mau faanahoraa e to tātou mau manaò taata.

I horoà faahou ai te Merahi i te tahi parau haapapūraa i te na ô raa e : “E pou mai te Varua Maitai i nià iho ia òe, e na te mana o te Teitei e tamaru i nià iho ia òe, e parauhia ai hoi tenā na Tamaiti moà, o te Tamaiti na te Atua”.

E hoa here mā, ua riro teie parau mai te tahi pehepehe, tei pehepehe i te rahi e te mana otiā òre o te Atua, te Tumu Nui no te mau mea e hiòhia nei e te mata taata e te mau mea ite òrehia, te Tumu Nui no te mau mea e maramaramahia e te feruriraa o te taata, e te mau mea o te òre roa e matara i te feruriraa o te taata. Aore roa hoi e mea e òre e tiā i te Tumu Nui. E tiā rā te mau mea atoà ia na, ua namua oia i te rave i te mau mea atoà no to tātou maitai e no to tātou ora. Ua namua òia i te faanaho i te mau mea atoà no te haereà mai no ta na Tamaiti, hou òia a tonono mai ai i ta na Merahi e fārerei ia Maria.

E i mua i teie mau parau a te Merahi, te faaroo nei tātou i te reo pahono o Maria, tei tuu i to na tiaturiraa taatoà i roto i teie mau parau e tei faī i to na faaroo i mua i te Atua i te na ôraa e, ***“Ei tavini au no te Fatu, ia na reira hia mai au mai ta òe i parau na”***. E faīraa faaroo nehenehe mau teie na teie nei potii, e o te hoē teie no te mau faīraa faaroo nehenehe roa e vai nei i roto i te Pipiria. E na roto i tona pūpūraa ia na iho i roto i te rima o te Atua, te faatupu hope roa nei òia i te òhipa ta te faaroo e titau nei, òia hoi, te fāriiraa ma te haehaa, e te auraroraa i te hinaaro o te Tumu Nui, taaē noa atu ai te iti o to na maramarama i nià i te òhipa e tupu ra, e i nià i tona maitiraa hia e te Atua.

“Ei tavini au no te Fatu, ia na reira hia mai au mai ta òe i parau na”.

E hoa here mā,

i mua i teie huru no Maria, e i mua i ta na faīraa faaroo, te faahiò atoà maira te reira ia tātou i te titauroa a te Atua ia tātou. Eaha te pahonora ta tātou tatai tahi e horoà i mua i teie titauroa. I te mea e te titau noa mai nei te Atua ia tātou e te tiai atoà mai nei i ta tātou pahonora.

I roto i teie hepetoma o ta tātou e haere atu nei e ò atu tātou i roto i te Oroà no Noera. E rave rahi te mau òhipa e tupu ; e àmui tahi te mau fetii i te vāhi hoê, e riro te tahi mau ò e te tahi mau taoà i te òperehia na te mau tamarii e na te feiā atoà i herehia e tātou, e riro atoà tatou i te faatupu i te tamaaraa ia nehenehe ia tātou ia òaòà i taua òroà ra.

E mea tià atoà rā ia tātou, ia faataa i te tahi taime no te fārerei i te Atua, no te faaroo i ta na e hinaaro nei e parau mai ia tātou, e ia nehenehe atoà ia tātou ia parau atu e : *“ei tavini au no òe, e ia na reirahia mai au mai ta òe e parau mai na”*.

Ia horoà mai te Atua Tumu Nui i te hau e te òaòà ia òutou i roto i teie òroà fanauraa no ta na Tamaiti.

Ia ora na.

Teiva TAPU
Orometua

FAAITOITORAA NO TE MAHANA NOERA (Mahana maa 25 no titema 1993)
--

Taiòraa : Ruta Ev. 2/ 1-20

Irava faaitoitoraa : 15 (v.h)

"Ua parau atura taua mau tiaì mamoe ra ratou ratou iho : Mai haere tātou i Peterehema e hiò i taua mea ra ta te Fatu i faaite mai ia tātou nei."

Ia ora nā i te Aroha o te Atua

No te haereraa mai o te Tamaiti a te Atua i te ao nei, ua rau te mau raveà ta te Atua i faaòhipa no te faaararaa i te taata i teie òpuaraa ta na. Ia au i te faaiteraa a te Pipiria, te vai ra te faaararaa a te mau taata tohu. Te vai atoà ra te faaararaa a te mau Veà a te Atua e ta te nātura. I roto i te faaiteraa a te nātura, ua ìte tātou i te òhipa tei rave hia e te fetià tei aratai i te mau matoi mai te hitià-o-te rā mai e tae roa i te vahi i fanau hia ai te Metia, te òire no Peterehema. Te auraa, ua faaòhipa te Atua i te nātura no te faaara i te taata i te fanauraa o ta na Tamaiti here. Mai te peu e, ua faaòhipa te Atua i te nātura. Ua tià roa atoà ia na i te faaòhipa i te tahi mau taata o ta na i maìti no te faatupuraa i to na hinaaro. Te òhipa ia tei rave hia e te tahi mau taata tohu i te faaiteraa na roto i ta rātou mau tohu i te haereraa mai o ta na Tamaiti here. A taa noa atu ai i te mau tuhaa a te nātura e te mau taata maìti hia no te tohu, ua faaòhipa pinepine te Atua i ta na mau Veà (merahi) no te faaara atoà i te haereraa mai o ta na Tamaiti here i te ao nei.

I roto i teie raveà ta te Atua i faaòhipa no te faaara i te taata, e rave rahi tei fanaò i teie huru faanahoraa mai ia Maria, Iotefa, te mau tiaì mamoe....

Te na ô ra ta tātou irava: "*Ua parau atura taua mau tiaì mamoe ra ratou ratou iho: Mai haere tātou i Peterehema e hiò i taua mea ra ta te Fatu i faaite mai ia tātou nei*"

Teie pupu taata riirii e tiaì mamoe te toroà, ua farerei hia e te veà a te Atua i te hoê taimè manaò-òre-hia e i te taimè te òhipa noa ra rātou. Eita tātou e hape, ia parau tātou o te Atua te tumu o teie farereiraa. No te hinaaro o te Atua i haere ai te veà e faaara i teie pupu taata. Mai te peu e hinaaro no te Atua, e tapaò faaite te reira e ua hinaaro òia e ia ite teie mau tiaì mamoe i ta na òpuaraa. Eita e òre tātou i te uiui e: e aha te Atua i maìti atoà ai i teie pupu taata no te faaara i te haereraa mai o ta na Tamaiti. Ia au i te faaìteraa a ta tātou taiòraa, ua tupu mau ā teie farereiraa noa atu ua mataù rii rātou. Ua faaara maitai te Veà i faaue hia ia na e parau. Ua faaroo maitai atoà te mau tiaì mamoe i te parau tei faaara hia e te Veà.

Te mea tei ite hia, ua òhipa taua parau ra i nià ia rātou. I mua i te faaararaa a te Veà, ua rave rātou i te faaotiraa i muri nei: "Mai haere tātou i Peterehema e hiò i taua mea ra ta te Fatu i faaite mai ia tātou nei." E au ra ia hiò anae hia, ua riro te parau a te Atua tei faaara hia e te Veà mai te tahi àuri òvahine tei huti i te mau tiaì mamoe i te vahi e tupu ai te parau e faaara hia ra. Na te reira i faaite mai ia tātou e ua farii mau teie pupu taata i te faaararaa a te Veà. Ia au i te huru tupuraa o te òhipa e au ra e ua farii rātou e ia parau te Atua ia rātou. E ua vaiiho rātou ia rātou e na te parau a te Atua e arataì. Ua faaroo rātou i te parau a te Atua, e ua rave rātou i ta te Parau a te Atua e titau ra ia rātou.

Na nià i te huru o teie mau tiaì mamoe, te ite ra tātou i te tahi haapiiraa ia tātou òia hoi ia farii tātou e na te Parau a te Atua e arataì ia tātou. Mai ia na i arataì i te mau tiaì mamoe i te vahi i fanau hia ai te Metia, e arataì atoà òia ia tātou i roto i te ìteraa e ua haere mai o Noera no te faaora ia tātou.

Ia haamaitai hia te Atua no ta na Parau e no ta na Horoà.

IA ORA NA I TE FATU

Tehaapapa òrometua.